

Wël Jethu cï Joon gõt Wët nhom

Wël cï Joon gõt aa Jethu nyuwoth ke ye Wët theer Nhialic tō thïn ë lanayon ku emën, ku abï tō thïn ë lanayon ku emën, ku abï tō thïn atheer, “Ku Wët aci bën a raan ku ciëŋ kek yo.” Cïmën ye athöör nhom guöp ye lueel, Joon ë gät wëlkä rin bï kəc kuen ye ŋic lön nadë ke Jethu yen Aluëk, Wën Nhialic wäär cï lëk kəc. Ku kəc bï wëtde gam aabi pïr. (20:31)

Jethu aye nyuwoth aban tuen yic, lön ë yen Wët Nhialic. Ku wël kək bö ciëen ë kënë cök, aa kək juëc jän göi cï Jethu looi. Ku kakkä aa Jethu nyuwoth aya lön ë yen Wën Nhialic, ku ë yen Aluän wäär cï lueel. Kakkä cök, kək jän göi cï röt tieŋ aaci teet yiic. Aban athör kënë ë yo lëk tē cï kəc kək wët Jethu gam thïn ku buøthkë. Ku dhäl kəc kək wëlke ku cïk wëtde gam.

Jək cökdit 13 yet 17 ala yic tē cï Jethu kek kacken ye buwoth reer thïn ë tøk wëer aköl wäär däm ye. Ku ëcï jam tënë kacken ye buwoth näakde nhom tuen tē bï kek röt guier thïn, ku deet kepuøth. Cök ciëen aa yo lëk dömdöm Jethu, ku luønde ku piëet cï ye piäat tim cï rïiu kəu, ku jön rotde. Ku jöl a nyooth cï yen rot nyuwoth tënë kacken ye buwoth jön rotde cök ciëen. Anyiköl tin cï kəar ye yök cökdit 8 yic, jək cök koor 1 yet 11 aci nyään wei kək cï gät theer yiic. Ku akēc kəc tuen kek ke war gëtgët wël Jethu yiic gõt. Ku aye kəc kək gõt aya tēdēt.

Joon ë miəc pïr akölrïëc ebën bï gäm kəc tē gem wët Raan cï ləc ku dəc, dëet kəc puøth. Ku ë miəc bï

rot jock emen ke bi gam kac bi Jethu gam, lon ye yen
dhel ku yic ku pir.

Kak to thin

Kak ci got tuej 1:1-18

Joon raan kac muoc nhim ku kac ci Jethu kan
buoth 1:19-51

Piooc e Jethu 2:1-12:50

Nin ci en kadhorou thuonde nom tuej 13:1-
19:42

Jon rot ku nyooth rot Bony 20:1-31

Kak ci got ci en nyooth rot det Galilia 21:1-25

Wet Pir

¹ Wathær kec nhial ku piny cak, Wet e to thin, ee
rær kek Nhialic, ku Wet e ye Nhialic. ² Wet e rær
kek Nhialic waar cek kan. ³ Kajuéc rær nhial ku
piny ebën aake cak e ye. Ku acin kak to thin kec
ke cak ke yeen liu thin. ⁴ Kuat kak to thin ebën aa
pir yok tene ye. Ku pierde aci ruel gam raan ebën.*
⁵ Pierde yen e ruel dep apei muöth yic, ku akec leu
bi kuöm nyin piny.

⁶ Nhialic eci atuönyde tooc, raan cal Joon. ⁷ Aci
ben bi kac ben lek bik ruel njic. Aci ben bi lek ke bi
raan ebën wet pin ku gem. ⁸ Yeen eci ye ruel, aci
ben bi kac ben lek ruel. ⁹ Ku Wet yen e ye ruel ayic,
ruel ci ben pinynhom tene raan ebën.

¹⁰ Wet e to pinynhom, ku Nhialic e cak piny e ye,
ku akec kac pinynhom njic. ¹¹ Yeen aci ben tene kak
ke ci cak, ku akec kacken ci cak lor. ¹² Ku aci kac
abek ben lor ku gamke wetde, goke gam riel bik aa
mith Nhialic. ¹³ Keek aacie mith Nhialic cit te ye

* **1:4** Wet yen aci ben aa pür **1:6** Mt 3:1; Mk 1:4; Lk 3:1-2

kac dhiëeth thïn, cïmën ye mïth la wun dhiëth ke. Ee Nhialic guöp yen ë Wunden.

¹⁴ Wët aci bën a raan ku ciëŋ ke ɣo. Ku diεkde acuk tïŋ, diik Wën töŋ Nhialic. Ku ë yen bïi yic, ku lier puöu Nhialic tënë ɣo.

¹⁵ Ku Joon aci tuöl ku lëk kac ë rienke ëlä, “Kënë yen ë raan wäär ye ɣen jam ë rienke, raan wäär ya lueel ëlä, ‘Yen abi lök bën ɣacök, ku adit tënë ɣa. Yeen ë rëër thïn wäär ke ɣa këc cak dhiëeth.’ ”

¹⁶ Rin käpuoeth ë yen Wën Nhialic, yen aci ɣo döc ebën, döc tök ë döc dët cök. ¹⁷ Wäthëer löŋ ëci Nhialic gäm kac ë Mothith, ku ëmën Nhialic aci yic ku lier piände gäm kac ë Jethu raan ci löc ku döc. ¹⁸ Acïn raan ci Nhialic kaŋ tïŋ tÿɣon. Ee Wën töŋ thöŋ kek Nhialic, rëër Wun lööm yen aci ɣo cöl anjic Nhialic.

Athön Joon raan kac muöc nhïm

(Mt 21:12-13; Mk 1:1-8; Lk 3:1-18)

¹⁹ Kocdit Itharel Jeruthalem aake ci kac käk Nhialic ku kac kuat Lebï tuöc tënë Joon, bik la thiëc ëlä, “Ye yïn ŋa?”

²⁰ Ku Joon akëc bën jai bi wët den dhuk nom. Aci bën bëër ë cök ku lueel ëlä, “Acie ɣen Raan ci löc ku döc.”

²¹ Gokë thiëc, “Aye yïn ŋa? Ee yïn Elija?” Go bëër, “Acie ɣa.” Gokë bën thiëc, “Ye yïn raandit käk Nhialic tïŋ bi bën?”† Go dhuök ke, “Yei! Acie ɣa.” ²² Gokë lueel, “Lëk ɣo, ee yïn ŋa? ɣok aa dhil wët dhuök kac ke toc ɣo. Ye rot yök ë yïn ŋa?” ²³ Go Joon bëër, “ɣen ë jam apëi roor tē cïi ceŋ, ‘Guierkë

† **1:21** Raan käk Nhialic tïŋ bi tuöl, bi bën Raan ci löc ku döc bën lueel. Tïŋ L.rou 18:15, 18; Mt 4:5

dhël Bëny bi la cök cimën wäär ci Ithaya raan kāk Nhialic tiŋ ye lueel.’ ”

²⁴ Röörkā aake tooc kōc akut Parathī, ²⁵ ku jōlkē Joon bēn thiēec ēlä, “Yenō ē yīn kōc muōoc nhīim tē cīi yīn ye Raan ci lōc ku dōc, ku yīn acie Elija ku cīi ye raandit kāk Nhialic tiŋ?” ²⁶ Go Joon dhuōk ke, “Yēn ē kōc muōoc nhīim pīu ē path, ku raan arēēr kamkun ē tēn ku acāk ŋic, ²⁷ raan yen lōk bēn yacōk ciēen, ku acā lēu ba warke dōk.” ²⁸ Kēn ē loi rot pan cōl Bethanī, wār Jordan kōu tēwäär ye Joon kōc muōoc nhīim thīn.

Amälthiin Nhialic

²⁹ Nayōn akōl dēt ke Joon tiŋ Jethu ke bō tēnē ye, go lueel, “Tiēŋkē Amälthiin Nhialic yen bā adumuōōm kōc pinynhom nyaai, kan abō. ³⁰ Yen ē raan ye yēn jam ē rienke wäär ē yēn ye lueel ēlä, ‘Yen abī lōk bēn yacōk, ku adit tēnē ya. Yeen ē rēēr thīn wäär ke ya kēc cak dhiēeth.’ ³¹ Aacā ŋic bi ya yen ŋa, ku yēn aci bēn ku ya kōc muōoc nhīim pīu rin bi yēn ye cōl aŋic kōc Itharel.”

³² Ku ēcī Joon lueel aya ēlä, “Yēn aci Wēi Nhialic tiŋ ke bō kecīt kuur ē dit, ku nyuuc yenhom. ³³ Ku ē ŋot kēc ŋic, ku ēcī Nhialic raan toc ya ba kōc aa muōoc nhīim pīu, lēk ya ēlä, ‘Raan bi yīn Wēi Nhialic tiŋ ke bō ku nyuuc yenhom yen ē raan bi kōc muōoc nhīim Wēi Nhialic.’ ³⁴ Ee yic, aca tiŋ ku alēu ba lueel, wenhīim lōn ē yen Wēn Nhialic.”

Kōc ci Jethu kaŋ buōoth

³⁵ Yōn akōl dēt, Joon ē kääc kek kōcken ye buōoth karou tēwäär akōl. ³⁶ Nawēn tiŋ Jethu ke tēk tēthiōk ke ke, go Joon dōt apēi ku lueel, “Tiēŋkē, yen akan

yen Amäl Nhialic.” ³⁷ Ku jəl piŋ kəc ye buəθh awən karou këya, gokë Jethu buəθh. ³⁸ Nawën wel Jethu yenhom, ke tih ke ke buəθh ye, go ke thiëec, “Yenö wiëckë?” Gokë lueel, “Rabi, rëër tēnen?” (Ku wētde yic, “Raan Piöc.”)

³⁹ Go lëk ke, “Bäk, bäk bën tih.” Gokë la ku tihkë tē rëer yen thïn. Ku ë ye tään aköl, ku jolkë rëer kek ye abi piŋ cuəl.

⁴⁰ Raan tök kam kəc wën karou cï wēt Joon piŋ ku buəθh Jethu, ee ye Andria wämēnh Thaimon Piter. ⁴¹ Naγon nhiäk rial, ke Andria räm ke mēnhë, go lëk ye, “Yok aaci Methaya yök.” (Ku wētde yic Raan cï ləc ku dəc.) ⁴² Ku γēth Thaimon tēnë Jethu. Go Jethu döt apeï ku lueel, “Yin ë Thaimon wën Joon, yin abi cəl Kepa.” (Ku yen Piter wētde yic ee kuur.)

Jethu aci Pilipo ku Nathaniel cəəl

⁴³ Nawën aköl dēt ke Jethu la Galilia, ke räm kek Pilipo, go lëk ye, “Buəθh γa.” ⁴⁴ Ku Pilipo ë raan Bethaida, ku ë gen yi Andria ku Piter aya. ⁴⁵ Go Pilipo Nathaniel yök ku lëk ye, “Yok aaci raan wäär cï Mothith gät ë rienke athör lööŋ yic, raan yen cï kəc kək Nhialic tih gät ë rienke aya, acuk yök. Yen ë Jethu wën Jothep raan Nadharet.”

⁴⁶ Go Nathaniel lueel, “Ye këpiath nō lëu bi tuəl Nadharet?” Go Pilipo bëer, “Bäär ba tih.”

⁴⁷ Nawën tih Jethu Nathaniel ke bö, ke jam rin Nathaniel ku lueel, “Raan kēnë ë raan Itharel ayic guəp, kecïn guəp ruēeny.”

⁴⁸ Go Nathaniel lueel, “Ca ŋic kēdë?” Go Jethu bëer, “Yin guə ŋic wën rëer yin ŋaap cök, tēwën kēc Pilipo la bi yi la cəəl.”

49 Go Nathaniel bēer ku lueel, “Raan piöoc, yin ë Wën Nhialic, yin ë Bëny Itharel.”

50 Go Jethu bēer, “Ca jäl gam rin ci yen ye lëk yi lon ci yen yi tiŋ wën reër yin ŋaap cök? Yin abi kädit kök wär ë kakkä tiŋ!” 51 Ku ben mat thïn, “Wët yic alëk we, wek aabi nhial tiŋ ke liep rot, ku atuuc Nhialic aa bäk tiŋ ke bö piny tēnē Manh Raan ku lek nhial.”

2

Yan thiëek pan Kana

1 Nïn kadiäk cök ciëen, ke ruäai loi gen Kana pan Galilia. Ku man Jethu ë tö thïn, 2 ku Jethu ëci cööl yai yic aya kek kacken ye buoath. 3 Nawën la möu thök, ke lëk man ye, “Möu aci liu tēnē ke.” 4 Go Jethu lueel, “Tiŋë, yin aci kē luoi dhil lëk ya. Akäldië aŋot kēc yëet.” 5 Go man lëk kəc luoi, “Luoi kē kāk bi lëk we ëbën.”

6 Ku tönydit kadätem aake cäp kəc löm. Tönykä aake ye ke piü tääu thïn bi kəc kecök aa lök, cit tē ye löŋ ciëen kəc Itharel ye nyuoath thïn. Ku täöny tök ë jät tē cit tēn aduök thiär-rou, tēdē aduök thiärdiäk. 7 Go Jethu lëk kəc luoi, “Thiänkē tönykä piü.” Gokē töny thiöŋ abik thook alic. 8 Ku jöl Jethu lëk ke, “Gëmkē ye tönykä yiic, ku gäm kē ke raan yen wun ruäai.” Gokē looi këya, 9 ku jöl raandit kəc athiëk awën piü thiëep, piü ci waar bi ya möu. Ku akuc tē bii möu thïn, aa kəc luoi wën thiöŋ töny kek aa ŋic ye. Go raandit kəc athiëk wun nya cööl, 10 ku lëk ye, “Raan ëbën ë muön path kaŋ gam tuen, ku na ci kəc jäl kueth ke muön lir ajöl lök gam. Ku yin ci muön path waan ciëen agut ëmën.” 11 Kēnē yen ë kēdit

jäng göi cï Jethu kaŋ looi gen Kana pan Galilia. Ku yen aci diëtde nyuoöth, ku aaci kacken ye buoöth jäl gam.

¹² Nawën ë kënë cök, ke Jethu la Kapernaum kek man ku wëët wun ku kacken ye buoöth, ku rëerkë thïn ë tëën nïn lik.

Jethu aci la luanŋ Nhialic

(Mt 21:12-13; Mk 11:15-17; Lk 19:45-46)

¹³ Yon cï Yan Ayum cïn yic luou jäl thiök, ke Jethu la Jeruthalem. ¹⁴ Ku jöl ler kal luanŋ Nhialic yic, ke yök kac ke yoc wei thïn ë yök ku amel ku jöl aa kuör. Ku kac wëëu waar yiic aake cï nyuc thïn aya. ¹⁵ Go waat nai ë wiën, ku cop kac wei kal luanŋ Nhialic yic kek yäkken ku thäkken ku weer wëëu wei, ku wel agenken yiic. ¹⁶ Ku lëk kac kuör yaac wei, “Nyaaikë kakkä ë tën, ku duökkë yon Wä col aye yon yoc.” ¹⁷ Go kacken ye buoöth wël cï göt athör thëer wël Nhialic yic tak. Wël ye lueel ëlä, “Yin Nhialic, nhiër yöndu adëp yapuöu cïmën mac.”

¹⁸ Go kacdït Itharel bën ku thiëckë, “Ye kädït jäng göi yindë ba looi ba nyuoöth yo, lon le yin yic ba kädït kënë looi?”

¹⁹ Go Jethu bëer ku lëk ke, “Rackë luanŋ Nhialic kënë, ku aba bën looi nïn kadiäk.” ²⁰ Gokë lueel, “Aci ruöön thiärŋuan ku dätem nök bi jäl thök, ku luel ka ba looi nïn kadiäk yiic?” ²¹ Ku luanŋ Nhialic jiëem Jethu ë guäpde. ²² Ku na wäär la jöt ranŋ yic, ke kacken ye buoöth tak këwäär cï lueel. Ku gamkë wël thëer Nhialic cï göt, ku wël cï Jethu lëk kac. ²³ Tëwäär rëer yen Jeruthalem yai yic, ke kac juëc

gam wētde wēn tīŋ kek kākken jāŋ gōi cī looi. ²⁴ Ku aake ŋic Jethu ebēn ku yen akēc rot nyuōth ke. ²⁵ Ku acīn kēn nadē ke wīc raan dēt bī ye nyuōth kəc, rin aŋic kāk tō raan puōu.

3

Jethu ku Nikodemo

¹ Raan akut Parathī cəl Nikodemo, ku ē ye raandūt kəc Itharel ē tō thīn, ² naŋon akōu wēēr tōk ke la tēnē Jethu ku lueel, “Raan piōoc, aŋicku yīn ē raan piōoc cī Nhialic tooc. Rin acīn raan loi kāk jāŋ gōi cīmēn yīn, tē liu Nhialic kek ye.”

³ Go Jethu bēēr, “Yīn alək yic, acīn raan bī bāāny Nhialic tīŋ, tē cīi ye ben dhiēeth dhiēn dēt.”

⁴ Go Nikodemo lueel, “Bī raan bēn dhiēeth kēdē? Lēu bī dhuk man yāc bī jāl bēn dhiēeth?”

⁵ Go Jethu bēēr, “Wēt yic alək yī, raan kēc bēn dhiēeth ē pīu ku Wēi Nhialic, acīi bāāny Nhialic bī yōk. ⁶ Raan aye dhiēeth kəc ē path, ku Wēi Nhialic ē pīr yam ye Nhialic gām kəc. ⁷ Duk ye gāi tē lək ŋen yī, lōn dhil we bēn dhiēeth. ⁸ Wēi Nhialic acīt mēn dhie ye raan yom piŋ ke wuu, ku cīi tē bīi yen thīn ku tē le yen thīn ŋic. Yen ē tēn kəc bī bēn dhiēeth Wēi Nhialic.” ⁹ Go Nikodemo thiēc, “Bī kēnē rot lēu kēdē?”

¹⁰ Go Jethu lək ye, “Yīn ē raan piōoc kəc pan Itharel ku kuc kēnē! ¹¹ Wēt yic alək yī, ŋok aa jam kāk ŋicku ku luelku kāk cuk tīŋ. Ku ŋot we jēi bāk wētda cīi gam. ¹² Na cāk wētdiē gam tē jīēm ŋen kāk pinynhom, ke we bī wētdiē gam kēdē tē jīēm ŋen tēnē we kāk Nhialic? ¹³ Acīn raan cīi kaŋ la nhial bī kāk Nhialic bēēi, ee raan bō nhial Manh Raan bō piny nhial.”

14 Cīmēn wäär cī Mothith luŋ wēeth cīt kēpiiny jat nhial roor bī yen kəc cī kēpiiny cam aa dəɔc, ke Manh Raan adhil ɣäth nhial, ¹⁵ rin bī raan gam wētde ebēn pīr akölriëc ebēn yök. ¹⁶ Nhialic anhiar kəc pinynhom apēi. Yen agem yen Wēnden juəl, bī raan ebēn wētde gam cīi mār, ku pīirkē akölriëc ebēn. ¹⁷ Ku Nhialic akēc Wēnde tuöc piny bī kəc bēn lušk wei, ee rin bī thāi pinynhom pīr ē rienke.

¹⁸ Raan gam wētde acīi bī lušk wei, ku raan cī jai bī wēt cīi gam acī lušk wei, rin kēc yen wēt Wēn tööŋ ē Nhialic gam. ¹⁹ Ku kēn bī ke lušk wei akīn, ruel acī bēn pinynhom ku kəc aa nhiaar muöth tēn ruel rin aa luui käreç.

²⁰ Raan ebēn käreç looi ē ruel maan ku cīi la ɣer yic, rin cīi yen käreç ye looi wic bī ke ŋic. ²¹ Ku raan luui kəpath ē bēn ɣer yic bī luəide nyuöth, rin cī ke luši Nhialic.

Joon acī bēn jam rin Jethu

²² Nawēn ke Jethu kek kəcken ye buöth la pan Judia, ku rēer thīn ke ke, ku muəc kəc nhīim pīu.

²³ Ku Joon ē ye kəc muəc nhīim aya tē cəl Aenon thiäak kek Thalim la yic pīu juēc. Ku kəc aake ye la bī ke la muəc nhīim. ²⁴ (Ku Joon ē ŋot kēc guə mac.)

²⁵ Nawēn ke kəc Joon buöth kək jəl teer kek raan Itharel rin lək ye kəc kegup lək, ²⁶ gokē la tēnē Joon ku luelkē, “Raan piöc, lēu ba mony wäär rēer kek yī wār Jordan aləŋtui tak, raan ye yīn jam ē rienke? Yen amuəc kəc nhīim emēn, ku kəc juēc aala tēnē ye!”

²⁷ Go Joon bēer, “Acin tē bī raan kēdāŋ yök tē kēc Nhialic ye gām ye. ²⁸ Week wepēc acäk piŋ ke lēk we ēlä, ‘Ÿen acie Raan cī lōc ku dōc, ku Ÿen acī tuōōc tuen ē path yenhom.’ ²⁹ Raan thiěk yen ē raan bī gām nya, ku mātħde ē kōōc ku ē pušu miēt tē piŋ yen rōlde. Yen ē miēt piändiē aya ēmēn. ³⁰ Yen abī dhiel dīt apēi ku Ÿen abī kuur.”

³¹ Raan bō nhial adīt tēnē kōc ēbēn, ku raan piiny ē kēn piny. Raan bō nhial atō kōc nhīim tuen ēbēn. ³² Ee kōc lēk kāk cī tiŋ ku kāk cī piŋ, ku acin raan wētde gam. ³³ Ku raan cī gam, acī gam lōn ye Nhialic yic lueel. ³⁴ Raan cī Nhialic tooc yen ē jam wēl Nhialic, rin aye Nhialic gām riel Wēike ēbēn. ³⁵ Wun ē Wēnde nhiaar ku tēū kēriēc ēbēn yecin. ³⁶ Raan gam wēt Wēn ē Nhialic abī pīr akōlriēc ēbēn, ku raan cīi wēt Wēn Nhialic bī gam acīi pīr akōlriēc ēbēn bī yök, rin acin kē bī riäk pušu ē Nhialic nyaai tēnē ye.

4

Jethu ku tiŋ pan Thamaría

¹ Nawēn ke ŋic Jethu lōn cī kōc akut Parathī ye piŋ, lōn nadē ke kōc aa bēn tēnē ye bī ke bēn muōōc nhīim, ku lōn cī yen la kōc juēc ye buōōth wār kōc Joon buōōth. ² (Ku acie yen ye kōc muōōc nhīim, aa kōcken ye buōōth.) ³ Nawēn piŋ wēt ye lueel, go jāl pan Judia ku dhuk Galilia. ⁴ Ku ē bī dhiel Ÿet pan Thamaría rin yen ē dhēl tēek yen thīn.

⁵ Go Ÿet pan Thamaría cōl Thikar thiäk ke piny wäär cī Jakop gām wēnde Jothep. ⁶ Ku yinh cī Jakop

cəl awec ë tō thīn. Nawēn cī Jethu dak ë cāth, go nyuc yith lōōm. Ku ë ye aköl ciel yic.

⁷ Go tiŋ pan Thamaria bēn yiith bī bēn gem pīu, go Jethu lēk ye, “Muɔc ɣen pīu ba dek.” ⁸ (Ku kɔcken ye buɔth aake cī la geuu bīk la ɣɔɔc miēth.)

⁹ Go tiŋ pan Thamaria lēk ye, “Kēdē wēn? Yīn ë raan Itharel ku thiēc ɣa, ɣen raan Thamaria ba yī muɔc ë pīu?” (Kɔc Itharel aake cie dek kek kɔc Thamaria.)

¹⁰ Go Jethu bēēr, “Na yī ŋic miɔc Nhialic ku raan thiēc yī pīu ŋuɔt aca thiēc, ku ŋuɔt aci muɔc pīu pīr.”

¹¹ Go tik lueel, “Bēny, yīn acīn kē gem yīn pīu, ku yith amec yic, ba pīu pīr yök tēnēn? ¹² Ye yīn dīt tēnē wädīt Jakop raan cī ɣo gām yīnh kēnē, ku dēk thīn yen ye nhom kek miēthke ku ɣäkke?”

¹³ Go Jethu bēēr, “Kuat raan dek pīukā abī rou bēn nök, ¹⁴ ku raan bī dek pīu ba yiěk ye acī rou bī bēn nök, ku pīu bī yiěk ye aabī ya dhiama yeyic ye pīu pīr kuēr thīn, ku yīk ye pīr alanden.”

¹⁵ Go tik lēk ye, “Bēny, yiěk ɣen pīukā bī rou ɣa cī ben nök, ba cī ben bēn tēn ba bēn gem pīu.” ¹⁶ Go Jethu lēk ye, “Lɔər cəl muɔnydu bāk bēn tēn.”

¹⁷ Go tik lueel, “ɣen acīn moc.” Go Jethu bēēr, “Kēdu ë yic, lɔn cīn yīn moc. ¹⁸ Yīn aci kaŋ rēer kek rōör kadhiēc, ku mony rēer kek yī emēn acie muɔnydu. Yīn aci yic lueel.”

¹⁹ Go tik lueel, “Bēny aca ŋic, yīn ë raan kāk Nhialic tiŋ. ²⁰ Wārkuuan thēer pan Thamaria aake ye Nhialic door ë gən kēnē nhom, ku ayakē

lueel wek kɔc Itharel lɔn dhil ɣok Nhialic la door Jeruthalem.”

²¹ Go Jethu lueel, “Gam wɛtdiɛ, yin tinɛ tɛ bi wek Wä door aci thiɔk, ku acie ɣɔn kɛnɛ nhom ku acie Jeruthalem. ²² Wek kɔc Thamaria wek kuc raan yakɛ door, ku ɣok kɔc Itharel ɣok aa njic raan yeku door rin pir abɔ tɛnɛ Itharel. ²³ Ku akɔl ajɔl bɛn, ku aci ɣuɔ bɛn ɛmɛn ɣuɔp, tɛ bi riɛl Wɛi Nhialic kɔc cɔl aa dor Wä cimɛnde, kek aa kɔc wic Wä bik ye door. ²⁴ Nhialic ɛ Wɛi, ku rin riɛl Wɛike yen alɛu ye bi door cimɛnde.”

²⁵ Go tik bɛn lɛk ye, “Aɲiɛc lɔn bi Raan ci lɔc ku dɔc bɛn. Na le bɛn ka bi ɣo nyuɔth kɛriɛɛc ɛbɛn.”

²⁶ Go Jethu bɛɛr, “Yen ɛ ɣɛn, raan jam kek yi.”

²⁷ Ku kaamthiin wɛn jiɛɛm kek, ke kɔcken ye buɔɔth bɔ ku ɣɛikɛ apɛi rin jiɛɛm yen kek tik. Ku acin raan tɔk kamken ci tik thiɛɛc, “Yenɔ wic, ku yenɔ jiɛɛm yen kek ye?”

²⁸ Go tik tɔnyden piu nyääh piny, ku ket ke dhuk geeu ku lɛk kɔc.

²⁹ “Bäk tiɛɲkɛ mony cä lɛk kɛriɛɛc ɛbɛn ca looi. Nadɛ ke ye Raan ci lɔc ku dɔc?” ³⁰ Gokɛ bɛn bei geeu bik la tɛnɛ Jethu.

³¹ Ku kaamthiin wɛn, ke lɛk kɔcken ye buɔɔth ye, “Raan piöoc, jɔl mɪth.”

³² Go bɛɛr, “ɣɛn ala miɛth, cin kɛ njieckɛ thin.”

³³ Go kɔcken ye buɔɔth rɔt jal aa thiɛɛc kamken, “Tɛdɛ le raan ci miɛth bɛɛi tɛnɛ ye?”

³⁴ Go Jethu lɛk ke, “Miɛthdiɛ ee lɔn ba wɛt raan toc ɣɛn looi, ku thääp luoi ci ɣäm ɣa. ³⁵ Cäk kääɲ ye lueel dhie ɛlä, ‘Pɛi kanɲuan aɲoot ku rap abi tem.’ Ku alɛk we, jatke wenyin bäk dum tin, yemɛn rap aaci

luok ku apath bi ke tem! ³⁶ Raan rap tem aye riop ku e koth pir tem alanden, keya raan cumcum ku raan temtem aabi puoth miest kedhie. ³⁷ Kään aci ya yic. ‘Raan tok e com ku tem raan det.’ ³⁸ Wek tuoc bak rap la tem dom yic ku e dom kec wek luui thin. Koc kok aaci luui thin ku wek aa rot kony luoiden.”

³⁹ Go koc juec Thamaría e gen wen yic wet Jethu gam, rin ci tik wet lueel ela, “Keriëec ebën ca looi aci lek ya.” ⁴⁰ Nawën bö koc Thamaría tenë ye ke lanke bi reer ke ke. Go Jethu nin karou nok thin teen.

⁴¹ Go koc kok juec wetde jal gam rin wel ye lek ke, ⁴² ku lekke tik, “Emën, yok aaci wet jal gam, ku akocku gam rin welkun ca lueel, ku e rin ci yok wetde pin ku njiku lon e yen Aluanj koc pinyhom ebën alanden.”

Jethu aci manh beny kony

⁴³ Nawën ci nin karou nok thin teen, ke Jethu jal jal ku ler lan Galilia. ⁴⁴ Rin yen Jethu guop eci lueel lon, “Raan kak Nhialic tinj acie theek wuonden.”

⁴⁵ Nawën yeet Galilia ke lor ape, rin waar ci kek kak ci Jethu looi yai yic tinj, waar ci kek la Yan Ayum cin yic luu yic Jeruthalem.

⁴⁶ Go Jethu ben dhuk gen Kana to Galilia, tewaar ci yen piu waar thin bi ya muon abiëc. Ku raandit kam koc mac baai ci manhde tuaany Kapernaum e to thin. ⁴⁷ Nawën pin lon ci Jethu jal Judia ku ben dhuk Galilia, ke la tenë ye ku lan bi la Kapernaum bi manhden ci thock ke thou kony bi pial. ⁴⁸ Go Jethu lek ye, “Acin raan bi ye gam kamkun te kec wek kit ku kadit janj goi tinj.”

49 Go raandit awën bëer ku lueel, “Bëny, bäär lokku ba manhdië dööt.” 50 Go Jethu lëk ye, “Lɔɔr, manhdu abi pïr.” Go mony wën wët Jethu gam ku jiël. 51 Wën cieth yen dhël yic, ke râm kek kɔcken luoi ku luelkë, “Manhdu aci yôr.”

52 Go ke thiëc aköl alɔɔ jɔl manhde ɲuëën. Gokë lueel, “Waraköl tään aköl yen ë jiël juäi yeguöp.” 53 Go wun ɲic lɔn ë yen aköl alɔɔ wäär ci Jethu ye lëk ye ëlä, “Manhdu abi pïr.” Ku jɔl wët Jethu gam kek kacke ëbën.

54 Kënë, yen aye kädit jän göi ci Jethu looi rou, wäär le yen dhuk Judia ku ler Galilia.

5

Raan tuany ruöön 38 aci kony

1 Nawën ke yan kɔc Itharel ë tɔ thïn, go Jethu la Jeruthalem yai yic. 2 Ku tËthiääk kek tË cɔl Kal Amël Thok, pul ë tɔ thïn, pul cɔl Bethaida thon kɔc Itharel. 3 Ku kɔc juëc tuany aake ye tɔc thïn, kɔc ci cɔɔr ku kɔc ci ɲɔl ku kɔc ci duany. Ku keek aake ye pïu tiit bik la tiaktiak, 4 rin atuny Nhialic ë ye bën pul yic, ku cɔl pïu ala tiaktiak, ku raan ci kaɲ la wïir tË ci pïu röt tiak, ke kony kuat tueny tɔ yeguöp. 5 Ku raan tuany ruöön thiärdiäk ku bët ë tɔ thïn. 6 Nawën tïɲ Jethu puak yic ke ci tɔc, ku aɲic lɔn ci ye tuaany run juëc, go thiëc, “Wic ba pial?”

7 Go raan tuany bëer, “Bëny, acin raandiën tɔ tËn bi ya yäth wïir tË tiak pïu röt thïn, rin na them ba la thïn, ke raan dët ë kaɲ wër thïn.”

8 Go Jethu lëk ye, “Jɔt rot ku löm biöɲdu ku cathë.”

9 Go raan wën guɔ pial ku kueny biöɲde ku cieth. Ku aköl looi kën rot ë ye aköl cïi kɔc Itharel ye luui,

¹⁰ go kəc Itharel lək mony cī kony, “Yaköl, aköl cīi kəc ye luui, ku akəc puəl tənë yī ba biñdu ket.”

¹¹ Go bëër, “Acī raan cā kony ba pial lək ɣa ëlä, ‘Löm biñdu ku cathë.’ ”

¹² Gokë thiëc, “Yenja yen raan cī lək, ‘Löm biñdu ku cathë?’ ”

¹³ Ku raan cī kony ë kuc raan kony ye, rin kəc juëc aake tō ë tēwën ku Jethu ëcī la liëplān wei.

¹⁴ Nawën ke yök Jethu luanḡ Nhialic, go lək ye, “Tij yīn acī pial ëmën, päl adumuööm, tädët ke kädët rac apēi abī röt ben luši yī.”

¹⁵ Go mony wën jäl ku le lək bāny Itharel lön ë Jethu yen acī ye kony bī pial. ¹⁶ Gokë jək bīk Jethu aa jöör rin cī yen raan kony aköl cīi kəc ye luui. ¹⁷ Go Jethu bëër tənë ke ëlä, “Wä ë luui aköläköl, ku ɣen adhil luui aya.”

¹⁸ Ku jam kënë acī bāny Itharel rac puöth apēi, ku wickë bīk nök, ku acie rin cī yen löḡ aköl cīi kəc ye luui thoḡ rot, ee rin cī yen ye lueel lön ye Nhialic Wun, ku këya acī rot looi bī thöḡ kek Nhialic.

¹⁹ Go Jethu jal bëër, “Wët yic alək we, acin kë ye Wät looi piände ë rot, kë ye looi ë tök, ee kë cī tīḡ kë ye Wun looi. Ku kë ye Wun looi aye Wënde looi aya. ²⁰ Rin Wun ë Wënde nhiaar, ku nyuth këriëc ye looi. Ku kädit tənë këwën aabi nyuöth ye, ku wek aabi jal gäi ëbën. ²¹ Cīmën ye Wun kəc cī thou jot ku yīk ke pīr, ke Wënde aya ë pīr yiëk kəc wīc ye. ²² Wun guöp acin raan ye luök wei. Ku acī Wënde yiëk riël bī looi tənë ke ëbën. ²³ Rin bī kəc ëbën Wënde theek cīmën ye kek Wun theek. Kuat raan cie Wënde ye theek, acie Wun ye theek raan toc ye.

24 “Wët yic alëk we, raan piŋ wëtdië, ku gem wët raan toc ya pîr akölrîëëc ëbën atö tënë ye. Acî bî luök wei, yeen acî jâl thou yic ku yök pîr. 25 Wek aa lëk yic, aköl bî bën, ku acî guo bën tē bî kəc cî thou rôl Wën Nhialic piŋ, ku kəc bî ye piŋ aabî pîr. 26 Cîmën ye pîr bën bei tënë Wun, këya, yeen acî Wënde looi bî ya tē ye pîr bën bei thîn aya. 27 Ku yeen acî Wënde yiëk riël bî luk looi tënë kəc, rin ye yen Manh Raan. 28 Duökkë gëi ë wët kënë, aköl bî kəc cî thou rôlde piŋ rëŋ yiic abö, 29 ku keek aabî bën bei ränken yiic, kəc cî n̄iëc luui apath aabî röt jöt ku aabî pîr, ku kəc cî luui käreëc aabî röt jöt ku aabî luök wei.

30 “Acî n̄ kë lëu ba looi piändië ë rot, yēn ë wët teem kecît kë cî Nhialic lëk ya, këya wët ca teem ala cök rin acie wët piändië yen wiëc ba looi, ee wët wïc raan toc ya ë rot.

31 “Na jaam ë rienkië ke kë lueel acie gam ciët ye yic. 32 Ku raan dët jam ë rienkië atö thîn, ku an̄iëc lön kë ye lueel rienkië ë yic. 33 Atuc aa cäk tuöc tënë Joon ku yeen acî wët yic lueel. 34 Acie lön bî yēn la raan jam ë rienkië, aya lueel yen kënë rin bî wek pîr. 35 Joon ë ye këcît mermer dëp ku mer piny, ku week ë yakë wïc kaam thin-nyöot bāk puöth miët thîn ruelde. 36 Ku raan jam ë rienkië atö thîn, ku wëtde aril tënë wët cî Joon lueel ë rienkië luoi ya ke looi, luoi cî Wä yiëk ya ba ke looi, keek aa jam ë rienkië ku nyoothkë lön cî Wä ya tooc. 37 Ku Wä aya, raan toc ya, yen ajam ë rienkië aya. Wek aa këc rôlde kaŋ piŋ ku akëckë kaŋ tîŋ, 38 ku wët cî lueel acäk ye muk wepuöth, rin cüi wek wët raan cî tooc ye gam.

³⁹ “Athör Nhialic ayakë kueen, rin ye wek ye tak lön bäk pîr akölrîëëc yök thîn. Ku keek aya aa jam ë riënkîë! ⁴⁰ Ku ñot cäk wïc bäk bën tënë ya bäk pîr yök thîn.

⁴¹ “Acä wïc bî kəc ya leec. ⁴² Ku wek ñiëc, ku añiëc lön töu nhiër Nhialic wepuöth. ⁴³ Yën aci bën kek riël ë Wä, ku kuëckë bäk ya lor, ku na bö raan dët kek riëlde ë rot ke yen abäk lor. ⁴⁴ Anhiarkë bäk læc yök tënë raan dët, ku acäk ye them bäk læc yök tënë Nhialic, ye kädë yen bî wek ya gam? ⁴⁵ Ku ëmën duökkë tak lön bî yën we luom tënë Wä. Mothith guöp yen abî we luom, ku ë Mothith yen acäk ñööth wepuöth. ⁴⁶ Na we cî Mothith gam alanden, ke wek ñot we gam ya aya, rin cî yen wël göt ë riënkîë. ⁴⁷ Ku rin ye wek kucë gäm wël cî göt, ke læukë kädë bäk wël ca læk we gam?”

6

Jethu aci miëth koor juak bî kəc juëc cam (Mt 14:13-21; Mk 6:30-44; Lk 9:10-17)

¹ Ye tëën ke Jethu tem wär Galilia cöl Tiberia aya. ² Go kəc juëc buöath rin cî kek kädit jän göi, cî yen kəc tuany kony tîj. ³ Go Jethu la göt nhom ku nyuuc kek kacken ye buöath. ⁴ Ku yan kəc Itharel, Yan Ayum cîn yic luou ëcî thiök. ⁵ Nawën ciëth Jethu piny ke tîj kəc juëc ke bö tënë ye, go Pilipo thiëëc, “Ye tëno bî yok miëth kueth kəc ëbën yööc thîn?” ⁶ Acî kënë lueel ku bî Pilipo them, rin ñic yen kë bî looi.

⁷ Go Pilipo bëër, “Rin bî raan tök ayum thin-nyöot yök, ka wïc wëëu juëc apei bî ayuöp yööc.” ⁸ Go Andria, mënh Thaimon Pîter, ku ë ye raan tök kam

kacken ye buoath lueel, ⁹ “Dhök atö thïn tën ke muk ayuöp kadhiëc ku rec karou, ku aaciï kackä ebën bi lëu.”

¹⁰ Go Jethu lëk ke, “Calkë kóc anyuc piiny.” (Ku noon ë dīt thïn ë tēën. Go kóc nyuc ebën piiny.) Ku rōör kepëc aake ye tēcīt tën tiim kadhiëc. ¹¹ Go Jethu ayuöp lööm ku leec Nhialic, ku tek ke tēnë kóc wën cī nyuc ebën. Ku ben looi këya kek rec, bi raan ebën kueth cīt tē wīc. ¹² Wën cī kek kueth ebën, ke lëk kacken ye buoath, “Kuanykë abëk cī döŋ piny, bi ciën kë riääk.” ¹³ Gokë ke kuany ebën, ku thiŋkë gäc thiäär ku rou abëk ayuöp cī döŋ piny, tēnë ayuöp kadhiëc wën cī ke tēk kóc bik cam.

¹⁴ Nawën tiŋ kóc wën luoi ril cī Jethu looi ke luelkë, “Kënë ë raan kāk Nhialic tiŋ yen bi dhiel bën pinynhom.” ¹⁵ Go Jethu jäl ŋic lön bi kek bën bik ye bën dām riël, ku loikë bi ya bēnyŋaknhom, go ben dhuk gat nhīim ë rot.

Jethu aci cath piu nhīim
(Mt 14:22-33; Mk 6:45-52)

¹⁶ Nawën cī piny cuol, ke kacken ye buoath la piny wär thok, ¹⁷ ku lek riäi yic, ku dhukkë ciëen wär alŋtui lŋ Kapernaum. Nawën ke wēër jol yic dīt ke Jethu ŋot këc bën tēnë ke. ¹⁸ Kaam wën ke yomdīt jät rot ku loi atiaktiak rot apēi. ¹⁹ Ku kacken ye buoath, aake ye tēcīt meel kadiäk ayi ŋuan wën tiŋ kek Jethu ke cath piu nhīim, ke bö tēthiök kek riäi, gokë riöc apēi, ²⁰ Go Jethu lëk ke, “Duökkë riöc, ee ŋen.” ²¹ Gokë jat riäi yic, ku go riäi guo yet wär thok tēwën le kek thïn.

Kóc aa wic Jethu

²² Nayon nhiäk ke tñj kəc ke cì döŋ wär aləŋtui, lən ë yen riän tökaliŋ yen aci döŋ. Ku aŋickë lən këc Jethu la riäi yic kek kəcken ye buəth, ku aake cì jäl ë röt. ²³ Go riëth kək ke bə Tiberia bən wär thok tətthiääk ke tēwäär ciem kəc juēc ayup thñn, wən cì Bēny læc gam. ²⁴ Nawën tñjkë lən liu Jethu thñn, ku liu kəcken ye buəth aya, gokë keec riäth yiic ku lek Kapernaum bik Jethu la wïc.

Jethu ayum ë pñr

²⁵ Nawën lek Jethu yök wär aləŋtui ke lëkkë ye, “Raan piöoc, ye nen bi yin ë tən?” ²⁶ Go Jethu bëer, “Wët yic alək we, wek aa wïc ya rin cì wek ayup cam təcit tē wiëckë, ku acie rin cì wek luəikiën ril deet yiic. ²⁷ Duəkkë lui rin miëth riääk, luəöikë rin miëth rëer rin pñr akölrüëc ebën. Miëth kënë abi Manh Raan yiëk we rin Wun, Nhialic aci rielde gam ye ku tooc.”

²⁸ Gokë thiëc, “Buk ñö looi buk luəi wïc Nhialic looi?”

²⁹ Go Jethu bëer, “Luəi wïc Nhialic bäk looi akñn, ë lən bäk wët raan cì tuöoc gam.”

³⁰ Gokë lueel, “Ye kñn riël ñö ba looi buk tñj ku buk wëtdu gam? Yenö ba looi? ³¹ Wärkuan thëer aacä ayum löny nhial cam roor, cimën cì ye güt athör thëer wël Nhialic yiic ëlä, ‘Ayum nhial aci yiëk ke bik cam.’ ”

³² Go Jethu lueel, “Wët yic alək we, kë cì Mothith yiëk we acie ayum pan nhial, ee Wä yen ë we yiëk ayum yic bö pan nhial. ³³ Rin ayum ye Nhialic gam ë yen raan bö piny pan nhial, ku yik thäi pinynhom pñr.”

³⁴ Gokë thięc, “Bëny, muɔc ɣo ayum kënë akölaköl.”

³⁵ Go Jethu lëk ke, “ɣɛn ayum ë pïr,” Ku raan bö tënë ɣa acïi cɔk bï kaŋ nök, “Ku raan gam wëtdië acïi rou bï nök. ³⁶ Ëmën, aca lëk we lɔn cï wek ɣa tïŋ, ku aŋot këckë gam. ³⁷ Raan ëbën cï Wä yiëk ɣa, yen abï bën tënë ɣa. Ku raan bï bën tënë ɣa acä bï cuɔp wei, ³⁸ rin cï ɣɛn bën pan nhial ba wët raan toc ɣa bën looi, ku acie wët piändië. ³⁹ Kë wïc raan toc ɣa ba looi akïn, bï ciën kë mär kam käk cï yiëk ɣa, ku ba ke jɔt ëbën aköl ciëen. ⁴⁰ Rin kë wïc Wä akïn, lɔn raan ëbën tïŋ Wënde ku gem wëtde, abï pïr akölrïëc ëbën yök thïn, ku keek aaba jɔt bïk pïr ëbën aköl ciëen.”

⁴¹ Go kɔc Itharel luööp guöp rin cï yen ye lueel ëlä, “ɣɛn ayum cï bën piny pan nhial.” ⁴² Ku luelkë, “Monyë cie Jethu wën Jothep? Wun ku man aa ŋicku. Ku yeŋö ye yen ye lueel lɔn cï yen bën piny pan nhial?”

⁴³ Go Jethu bëër, “Duökkë lum kamkun. ⁴⁴ Acïn raan lëu ye bï bën tënë ɣa të këc Wä ë toc ɣa ye thël ɣɛn, ku aba jɔt bï pïr aköl ciëen. ⁴⁵ Acï käk Nhialic tïŋ göt ëlä, ‘Kɔc ëbën aabï Nhialic ke piöc.’ Raan ëbën piŋ wët Wä ku piöc tënë ye ë bën tënë ɣa. ⁴⁶ Ku acie rin nadë yen raan cï Wä kaŋ tïŋ, raan bö tënë Nhialic, yeen ë rot, yen ë raan cï Wä kaŋ tïŋ. ⁴⁷ Wët yic alëk we, raan gam wët ala pïr alanden. ⁴⁸ ɣɛn ayum ë pïr. ⁴⁹ Wärkun thɛɛr aacä ayum löny nhial cam roor ku aacï thou. ⁵⁰ Ku ayum bö piny pan nhial, yen acit kën na ciëm raan ka cie bën thou. ⁵¹ ɣɛn ayum ë pïr cï bën piny pan nhial. Raan

cam ayum kënë, ka pîr akölrîëc ëbën. Ayum yen ba yiëk ye ë riëndië ya gam bî kəc ëbën pîr.”

⁵² Go kəc Itharel teer apɛi kamken, ku thiëckë, “Lëu mony kënë kədë, bî riëndië yiëk ɣo buk cuet?”

⁵³ Go Jethu bëër, “Wët yic alëk we, tɛ cî wek Manh Raan cuet ku dëkkë riëndië ka cîn pîr bäk yök wëikun yiic. ⁵⁴ Raan cuet riëndië ku dek riëndië ala pîr alanden, ku abî jət aköl ciëen bî pîr. ⁵⁵ Rin riëndië ë miëth alanden, ku riëndië ë këdek alanden. ⁵⁶ Raan cuet riëndië ku dek riëndië abî pîr ɣayic, ku ɣen abî pîr yeyic. ⁵⁷ Wä pîr acä tooc, ku ë rin rienke yen abî ɣen aya, ku këya raan cuet ɣen abî pîr ë rienkië. ⁵⁸ Ku yen kîn ayum bö piny pan nhial, acii thöŋ kek ayum cî wärkun thɛer cam ku lökkë thou. Raan cam ayum kënë abî pîr akölrîëc ëbën.”

⁵⁹ Wëlkä aaci Jethu lueel wäär piöoc yen kəc tən amat Kapernaum.

Wël pîr akölrîëc

⁶⁰ Nawën piŋ kəc juëc ye buoθh wëlkä, ke luelkë, “Piöoc kënë aril apɛi. Yeŋa lëu bî ke piŋ?” ⁶¹ Go Jethu ŋic lən jiem kek wël wën, ku lëk ke, “Wiëckë bäk jäl rin ë wëlkä? ⁶² Yeŋö bäk looi tɛ tîŋ wek Manh Raan ke dhuk nhial tɛwën rëer yen thîn? ⁶³ Ee Wëi Nhialic yen ë pîr gam, ku riël raan acin kë ye kony. Wël ca lëk we aa wëi ku aa pîr. ⁶⁴ Ku këya acii kəc kək kamkun ye gam.” (Rin ëcî Jethu guo ŋic tuen lən ye yiŋa cii bî gam, ku yeŋa bî ye gaany.) ⁶⁵ Ku ben lueel, “Ee rin wët kënë guɣp yen alëk ɣen ye we, lən acin raan lëu ye bî bën tënë ɣa, tɛ këc Wä ye looi bî yic pial tënë ye.”

⁶⁶ Ku rin ë wëlkä, ke kəc juęc kam kəc ye buəth dhuk ciëen, ku cık ben cath kek ye. ⁶⁷ Go Jethu atuöccke thiäär ku rou thiëc, “Na week, więcķë bāk jāl aya?”

⁶⁸ Go Thaimon Piter bëer tənë ye, “Bëny, buk la tənë ŋa? Yin ala wël pır alanden. ⁶⁹ Ku emën acuk gam ku acuk ŋic lön ë yin raan dhëŋ bö tənë Nhialic.”

⁷⁰ Go Jethu bëer, “Cie ŋen ŋa kuany we wathiäär ku rou? Ku raan tők kamkun aŋot ye jəŋrac.”

⁷¹ Yeen ë jam rin Judath, wën Thaimon Ithkariöt. Rin Judath, na cək alön ë yen raan tők kam atuöccke kathiäär ku rou, ka wïc bī ye luəm.

7

Jethu ku wämäthakën

¹ Wën ë wëlkä cök ciëen, ke Jethu kueny bëei Galilia yiic, ku ë kęc wïc bī la keny Judia, rin wïc bāny Itharel tō Judia ye bīk nök. ² Ku yan kəc Itharel cəl Yan Duël ëcī thiök. ³ Go wämäthakën lək ye, “Jäl ë tən ku lər Judia bī kockun yī buəth luəidun ye looi tiŋ. ⁴ Acin raan kē looi thiaan tē wïc yen ye bī ŋic apath. Rin ye yin kākķa looi, ke yī cəl kəc pinynhom aa ŋic yī.” ⁵ Agut wämäthakën aakęc wētde gam, yen aa lueel kek ye këya.

⁶ Go Jethu lək ke, “Akäldië guöp aŋot kęc yëet. Ku na ye we, ke kuat aköl ebën apath. ⁷ Acin tē bī kəc pinynhom we maan, ku keek aa man ŋa rin aya lueel, lön ręc luəiken. ⁸ Lak yai yic, ku ŋen aciī la ë yan kënë yic, rin aköldiën bī ŋen la akęc guə bën.” ⁹ Yeen aci jam këya ku jəl rëer pan Galilia.

Jethu ala Yan Duël yic

¹⁰ Nawën cī wämāthakën la yai yic, ke Jethu lök la aya, ku akëc la ke njic, yeen aci la ke mony rot.

¹¹ Ku bāny Itharel aake wïc Jethu yai yic, ku thiëckë, “Tö monyë tēnen?”

¹² Ku aluɔp ë dīt apɛi ë rienke. Aye kɔc kɔk lueel, “Yeen ë raan path.” Ku lueel kɔc kɔk, “Acie këya, yeen ë raan kɔc duɔɔŋ.” ¹³ Ku acin raan ye jam ë rienke kɔc nhïim, rin riɔɔc kek bāny Itharel.

¹⁴ Wën cī nin abëk yai thök, ke Jethu la kal luan Nhialic yic ku jəl kɔc piɔɔc. ¹⁵ Go bāny Itharel gāi apɛi ku luelkë, “Ye raan kënë kāŋ njic kädë ku akëc kaŋ piɔɔc.”

¹⁶ Go Jethu bëër, “Wël ya piɔɔc acie wëlkië aa wël bö bei tēnë Nhialic, Aciëŋ cī ɣa tooc. ¹⁷ Raan wïc ye bī kë wïc Nhialic looi, abī njic lɔn nadë kë ya piɔɔc abö tēnë Nhialic, ku acie rieldei ë rot. ¹⁸ Raan jam rielde ë rot ë lɛc yen aye wïc, ku raan wïc lɛc tēnë raan toc ye, yen ë raan path, ku acin ruëeny tō yepuɔu. ¹⁹ Këc Mothith löŋ Nhialic nyuöth we? Ku acin raan löŋ theek kamkun. Yenö ye wek ye wïc bāk ɣa nök?”

²⁰ Go kɔc juëc wën bëër, “Yin ala guöp jɔŋrac, yença wïc ye bī yī nök?”

²¹ Go Jethu bëër, “Këdit jāŋ gōi tök aca looi guökë gāi wedhie. ²² Mothith aci we thɔn bāk miëthkun aa ŋoot, ku acie Mothith guöp yen cī wët kënë jɔɔk, aa wärkun thɛɛr, ku këya wek a dhök ŋoot aköl cii kɔc ye luui. ²³ Ku ëmën na ŋot dhök aköl cii kɔc ye luui rin bī löŋ Mothith cii dhäl yic, yenö ye wek puöth riääk tēnë ɣa, rin cī ɣen raan tök kony bī pial

aköl cii kəc ye luui? ²⁴ Duökkē raan ye guo tēm awuöc wēt kōu ayeer, yakē raan tēm awuöc wēt ē yic.”

Ye Jethu raan cī ləc ku dəc?

²⁵ Go kəc kək Jeruthalem lueel elä, “Cie raan kënë yen wickē bik nök. ²⁶ Tiēŋkē! Yen kīn jam kəc nhīim, ku acīn kē luelkē ē rienke. Tēdē, cii bāny ŋic lən ē yen Raan cī ləc ku dəc? ²⁷ Na la Raan cī ləc ku dəc bēn, ka cīn raan bī ye ŋic tē bī yen thīn, ku aŋicku ebēn yen tē bīi mony kënë thīn.”

²⁸ Nawēn piöc Jethu luanj Nhialic ke lueel röldit, “Ee tēdē, wek aa ŋic ya ku aŋieckē yen tē bī yen thīn. Ku yen akēc bēn wētdiē ē rot, ku yeen raan toc ya ala yic ku yeen akuöckē, ²⁹ Ku yeen aŋiec rin bī yen tēnē ye, ku yen acā tooc.”

³⁰ Gokē wic bik dəm, ku acīn raan cī yecin tāäu yeguöp rin kēc akälde guo bēn. ³¹ Go kəc juēc thān wēn yic wētde gam ku luelkē, “Tē bī Raan cī ləc ku dəc bī kädit jāj göi looi cimēn ē raan kënë?”

Apuruuk aaci tooc bik Jethu la dəm

³² Nawēn piŋ kəc akut Parathī lən ye kəc juēc wēn wēlkā loop kamken rin Jethu, ke keek ku bāny kāk Nhialic toc apuruuk luanj Nhialic tiit bik Jethu la dəm. ³³ Go Jethu lueel, “Yen abī rēer kamkun tēthin-nyöat, ku yen abī la tēnē raan yen cā tooc. ³⁴ Wek abā wic, ku wek aaciī ya bī yök, rin acīn tē bī wek la tē rēer yen thīn.”

³⁵ Go bāny Itharel lueel kamken, “Bī la dā buk cii ben yök? Cī bī la gēeth Girik yiic tē ciēŋ kəc Itharel thīn, ku bī kəc Girik piöc? ³⁶ Aye lueel, wek abā wic

ku wek aaciï yen bi yök, ku wek aaciï bi la tē rēer yen thīn, yeñö wic bi lueel?”

Kuëer pīu ë pīr

³⁷ Aköl ciēen yen aköl dīt nin yai. Akölē, Jethu aci rot jət ku lueel röldīt, “Kuat raan nēk rou abi bēn tēnē ya ku bi dek. ³⁸ Cīmēn cī ye gōt athör thēer wēl Nhialic yic elä, ‘Raan gam wētđiē, kuëer pīu ë pīr abi rēer yepuōu.’ ” ³⁹ Kēnē aci Jethu lueel rin Wēi Nhialic, bi kōc gam wētde lōk yök. Ku tēnē, Wēi Nhialic a kēc guō gam tēnē kōc, rin kēc Jethu guō la diēkde yic.

Kōc aaci keyiic tek

⁴⁰ Kōc kōk kam kōc wēn aaci kēnē piñ ku luelkē, “Raan kēnē ë raan kāk Nhialic tiñ alanden!” ⁴¹ Go kōc kōk lueel, “Yen ë Raan cī lōc ku dōc!” Ku lueel kōc kōk, “Raan cī lōc ku dōc aaciï bi bēn pan Galilia! ⁴² Aci gōt athör thēer wēl Nhialic yic lōn Raan cī lōc ku dōc abi ya raan dhiēnh Debit, ku abi dhiēeth Bethalem, gen wäär ciēñ Debit thīn.”

⁴³ Go kōc wēn keyiic tek ë riēnke. ⁴⁴ Ku wickē bik dōm, ku acīn raan cī yecin tāäu yeguöp. ⁴⁵ Nawēn dhuk apuruuk ciēen tēnē bāny kāk Nhialic ku kōc akut Parathī, gokē ke thiēēc, “Yeñö kēc wek ye bēēi?” ⁴⁶ Go apuruuk bēēr, “Acīn raan cī kañ jam cīmēn ë mony kēnē!” ⁴⁷ Go kōc akut Parathī ke thiēēc, “Cī we duōñ aya? ⁴⁸ Le raan tōk kam bāny, ayī kam kōc akut Parathī cī wētde gam cāk kañ piñ? ⁴⁹ Kōckä aa kuc lōñ Mothith, ku aa kōc cī Nhialic lām kērac.” ⁵⁰ Go raan tōk kam kōc akut Parathī, raan cī kañ la bi Jethu la tiñ, cōl Nikodemo lēk ke,

7:37 Leb 23:36
2Tha 7:12; Mai 5:2

7:38 Ith 44:3; Edhe 47:1; Dhäk 14:8
7:50 Jn 3:1-2

7:42

51 “Na ye löŋ ciεεŋ panda, ka cïn tē bī yök raan luök wei ke këcku kaŋ piŋ thok tuenŋ, ku ŋicku kë cī looi.”

52 Gokë bēēr, “Yiïn aya, ye raan Galilia? Kuen athör thεεr wël Nhialic, ku aba ŋic lön acïn raan kāk Nhialic bēn Galilia.”

[53 Nawēn cī raan ēbēn dhuk paande,

8

Tiŋ cī käl piny ke kər

1 ke Jethu la gən Olip nhom. 2 Nayon nhiäk dur yic ke dhuk luanŋ Nhialic. Go kəc ēbēn guēer yelööm, ku nyuuc piiny ku jək piöoc cök tēnē ke. 3 Go kəc piöoc lööŋ ku kəc akut Parathī tik bēēi, ku ē tiŋ cī käl piny ke kər. Ku cölkē akäac kəc nhīim ēbēn, 4 ku luelkē tēnē Jethu, “Raan piöoc, tiŋ kēnē acī käl piny ke kər. 5 Mothith acī löŋ lək yo athör yic lön kuat tiŋ loi këcīt kēnē, adhil biöök aleel bī thou. Na yiïn emēn, ye lueel këdē?” 6 Keek aake jam kēlä bīk Jethu deep bīk wēt yök bīk la luəm. Go Jethu guŋ ku gēt piny yecin.

7 Nawēn ŋot ke kääc ku yekē thiēec, ke jət yeköu ku lək ke, “Na le raan kamkun cïn adumuööm cīi kaŋ looi, ke biök alel tuenŋ yeguöp.” 8 Ku ben guŋ ku gēt piny yecin. 9 Nawēn cik wēt kēnē piŋ, ke jiël ēbēn ke wath röt, ku kəŋ kəcđit jäl tuenŋ, agut tē döŋ Jethu ē rot, ku tiŋ wēn ke ŋot kääc yenhom. 10 Go yeköu jət ku lək ye, “Tökē tēno? Cïn raan cīi döŋ bī yī luök wei?”

11 Go bëër, “Acin raan Bëny.” Go Jethu lueel, “Apath, ke yïin acä bï luök wei aya. Ləor ku duk adumuööm ben looi.”]*

Jethu ee mermer pinyinhom

12 Go Jethu ben jam tənë kəc ku lueel, “Ÿen ë ruel pinyinhom, kuat raan buōth Ʒa abï ruel pïr yök, ku acïi bï kaƷ cath muööth yic.” 13 Go kəc akut Parathï lëk ye, “Ëmën, yïn ajam ë rienku, ku wët ca lueel acin kë ye nyuōth.”

14 Go Jethu bëër, “Acie këya, na cək alon jïem Ʒen ë rienkië, ke wët lueel ë yic, rin Ʒen aƷic tē bïi Ʒen thïn. Ku wek aa kuc tē bïi Ʒen thïn ayï tē ler Ʒen thïn. 15 Wek aa wët teem cïmën wët raan, ku Ʒen acin raan ya gäm awuöc. 16 Ku tē bï Ʒen wët teem, ke wët ba teem abï jal a yic, rin acie Ʒen tem wët, Wä ë toc Ʒen arëër ke Ʒa. 17 Wët acï göt löndun yic lön tē lueel kəc karou wët tök luk yic, ke wët den ë ya yic. 18 Ÿen ajam ë rienkië, ku Wä cä tooc ajam ë rienkië aya.”

19 Gokë thiëc, “Tö Wuur tēno?” Go Jethu bëër, “Wek aacïi Ʒa Ʒic, ku wek aacïi Wä Ʒic. Na we Ʒic Ʒa, Ʒuöt wek aa Ʒic Wä aya.”

20 Wëlkä ëbën aacï Jethu lueel wäär piöoc yen luan Nhialic, Ʒön cï kəkken ajuër tšu thïn. Ku acin raan cie dəm rin këc akälde guō bën.

Wek aacïi la tēdiën ler Ʒen thïn

* **8:11** Athör theer juëc aacie (7:53–8:11) ye mat thïn. Ku athör kək ee bën Jn 21:24 cök, ku kək ë Lk 21:38. Ku athör tök ee lök bën Jn 7:36 cök. **8:12** Mt 5:14; Jn 9:5 **8:13** Jn 5:31

21 Go Jethu ben læk ke, “Ÿen abi jäl ku wek abä wïc, ku wek aabi thou awäckun yiic. Të le Ÿen thïn, acie yen tē bï wek la thïn.”

22 Tëwën, ke lueel bänny Itharel, “Aye lueel lön cïi yok bi la tē le yen thïn. Ye ciët bï rot nök?”

23 Go Jethu bëër, “Wek aa kəc piny tën, ku Ÿen ee raan bö nhial. Wek aa kəc piny kënë nom, ku Ÿen acie raan piny nom tën. 24 Ee rin kënë yen aci Ÿen ye lueel lön bï wek thou adumuömkun yiic. Ku wek aabi thou adumuömkun yiic tē kęc wek ye gam, lön ë Ÿen tō thïn, yen ë Ÿen.”

25 Gokë thiëc, “Ye yïn ŋa?” Go Jethu bëër, “Wët aca læk we tëwën jock Ÿen wët cök.† 26 Ÿen ala wël juëc ba ke lueel ë rienkun, ku wël juëc bï Ÿen ke we luök wei. Ku raan cä tooc guöp ala yic, ku Ÿen ë kəc læk kuat kē ca piŋ tënë ye.”

27 Gokë kęc deet lön jiem Jethu wët Wun. 28 Go Jethu ben lueel tënë ke, “Aköl bï wek Manh Raan jat nhial, ka bäk jäl ŋic lön, ‘Ÿen tō thïn Yen ë Ÿen.’ Ku abäk deet yic aya lön acin kē ya looi ruotdië, ku aa ya ke lueel wël cï Wä piöc tënë ya. 29 Ku raan cä tooc arëër ke ya, ku akęc ya nyääŋ piny yatök, rin ye Ÿen wët nhiëer looi akölaköl.”

30 Go kəc juëc cï Jethu piŋ ke jam ë wëlkä wëtde jäl gam.

Kəc lääu nhïim ku kəc aloony

31 Go Jethu læk kəc Itharel cï wëtde gam, “Na piëŋkë wël ca piöc, ke wek aa kockiën buath ya ayic, 32 ku wek aabi yic ŋic, ku yic abi we wëër bei.”

† 8:25 Yenö ben Ÿen jam tënë we.

³³ Gokë bëër, “Yok aa kəc dhiënh Abaram, ku acin kəc kək cii yo kan loony. Ku na luel, ‘Wek aabi wëër bei,’ ke yeñö wic ba luel?”

³⁴ Go Jethu lək ke, “Yic alək we, raan ëbën cä adumuööm looi yen alony adumuööm. ³⁵ Alony acie raan mac thok alanden, ku Wät yen ee raan thin lanayən. ³⁶ Na cï Wät we wëër bei, ke wek aabi rëer ke cin loony alanden.

³⁷ “Anיע lən ye wek dhiën Abaram. Ku anot wiëckë bək ya nək, rin piöcidië acäk ye gam. ³⁸ Kë cï Wä nyuöth ya yen aya luel, ku wek aa loi kë cï wärkun lək we.”

³⁹ Gokë bëër tənë ye, “Abaram yen ë wäda.” Go Jethu wët dhuk nhom ku luel, “Na we mith Abaram alanden, nuöt wek aa loi këcüt kë cï Abaram looi. ⁴⁰ Këriëc ëbën ca looi ë rin ba we lək yiny ca piñ tənë Wä, ku anot wiëckë bək ya nək. Abaram acin kë cï looi cüt kënë! ⁴¹ Wek aa loi kë cï wärkun looi.” Gokë luel, “Nhialic yetök yen ë Wäda, ku yok aa miëthke guöp.”

⁴² Go Jethu bëër tənë ke, “Të ye Nhialic wuurdun guöp, nuöt wek nhiaar ya, rin cï yen bën tənë Nhialic, ku ëmën yen atö tən. Yen akëc bën wëtdië ë rot, ee yen acä tooc. ⁴³ Yeñö cii wek kë ya luel ye deet yic? Ee rin cii wek ye lëu bək wëtdië piñ. ⁴⁴ Ee jərac yen ë wuurdun, ku ayakë nhiaar bi ya kën wuurdun yen yakë looi. Yen ë raan ë tir tēthëer yən, ku akëc yic kan luel rin ye yen alueeth, ku ye wun lueth ëbën. ⁴⁵ Yen aluel yic, ku rin ë kënë yen akëc wek ya gam. ⁴⁶ Yeña kamkun lëu ye bi awuöc nyooth yaguöp rin adumuööm ca looi? Na luel yic, ke ye rin njo cii wek ya ye gam? ⁴⁷ Raan

bö tēnē Nhialic ē wēt Nhialic piŋ, wek aaciī bö tēnē Nhialic, ku yen ē kē cii wek wēt bi piŋ.”

Jethu ku Abaram

⁴⁸ Go kəc Itharel bēēr tēnē Jethu, “Kēcku wēt yic lueel wēn lən ē yin raan pan Thamaria, ku jəŋrac atō yiguöp?”

⁴⁹ Go Jethu bēēr, “Acin jəŋrac tō yaguöp, yen ē Wä theek ku wek aa ya dhöl guöp, ⁵⁰ Yen aciī lēcdiē wic. Raan wic ye atō thīn, ku ē wēt teem bā kony. ⁵¹ Wēt yic alēk we, raan piŋ wētdiē aciī bi thou akölriēēc ēbēn.”

⁵² Go kəc Itharel lēk yen. “Ēmēn, anjicku alanden lən tō jəŋrac yiguöp. Abaram aci thou, ku kəc kək Nhialic tiŋ aaci thou aya ku ŋot ye lueel, ‘Raan piŋ wētdiē aciī bi thou akölriēēc ēbēn.’ ⁵³ Abaram wāda aci thou, nadē ye lueel lən diit yin tēnē Abaram? Ku kəc kək Nhialic tiŋ aaci thou aya. Ye tak ye yin ē ŋa?”

⁵⁴ Go Jethu bēēr, “Na ya ci rot leec, ŋuət lēc kēnē acie lēc acin. Ee Wä yen ē raan ya leec, ku yeen guöp ayakē lueel ke Nhialicdun. ⁵⁵ Yeen akēckē kaŋ ŋic, ku yeen anjiec. Na lueel lən kuc yen ye, ke yen abi ya alueeth cimēndun, ku yeen anjiec, ku yen ē wētde looi pušu ēbēn. ⁵⁶ Wuurdun Abaram aci pušu miēt apēi lən bi yen aköl bēndiē tiŋ, aci tiŋ ku aci pušu la yum.” ⁵⁷ Go kəc Itharel lēk ye, “Yin anot yi kēc ruōōn thiārdhiēc dōōt, ku yin ca Abaram tiŋ?” ⁵⁸ Go Jethu bēēr, “Wēt yic alēk we, wāār kēc Abaram guō dhiēēth, ‘Ke Yen atō thīn.’ ” ⁵⁹ Gokē aleel kuany bi kek ye biōōk, go Jethu rot thiaan ku jiēl yōn Nhialic.

9

Jethu aci raan ci dhiëeth ke ci cɔər kony

¹ Tëwën cieth Jethu, ke tɨŋ raan ci dhiëeth ke ci cɔər. Go kɔcken ye buɔth thiëëc, ² “Raan piööc, ye adumuössm ci ŋa looi cɔl ye adhiëth ke ci cɔər? Ye adumuössmde aye adumuössm kɔc ke dhiëth ye?”

³ Go Jethu bëër, “Kë ci yen cɔər acie rin adumuössm ci looi, ayi rin adumuössm ci kɔc ke dhiëth ye looi, yeen aci cɔər bi riel luɔi Nhialic tɨŋ yeguöp. ⁴ ʏok aa dhil la tueŋ ʏo lui luɔi raan cä tooc ʏet tē ŋot ruel aköl, waköu abö, ku acin raan bi ye lëu bi luui. ⁵ ʏet aköl ŋoot ʏen pinynhom, ke ʏen ë ruel tēnë kɔc.”

⁶ Tëwën ci yen jam kälä, ke ŋuut piny ku nueen tiöp luëeth, ku rɔoth tiöp mony wën nyin, ⁷ ku lëk ye, “Lɔər lɔk yinyin wär Thiloam.” (Ku wëtde yic, “Ci tooc.”) Go mony wën la ku lɔk yenyin, ku le dhuk ke ye piny tɨŋ. ⁸ Go kɔc akeu nhom ku kɔc ci ye kaŋ tɨŋ ke lɨm thiëc, “Cie mony dhie cool nyuc piiny ke lɨm kënë?”

⁹ Go kɔc kɔk lueel, “Ee yeen guöp.” Ku lueel kɔc kɔk, “Acie ye ë raan thöŋ kek ye.” Go mony wën nhom lueel, “Ee ʏen raan wën guöp.”

¹⁰ Gokë thiëëc, “Ci rot lëu kädë ba ben daai?”

¹¹ Go bëër, “Mony cɔl Jethu aci tiöp nueen ku rɔoth ʏanyin ku lëk ʏa, ‘Lɔər wär Thiloam ku lɔk yinyin.’ Guɔ la, ku kaam wën lɔk ʏen ʏanyin, ke ʏa tɨŋ piny nyin yic.”

¹² Gokë thiëëc, “Yen ako?” Go bëër, “Akuöc.”

Akut Parathï awïc wët tē ci cɔər kuony thïn

13 Gokë mony wën cī cəər thəl tənē kəc akut Parathī. 14 Aköl nueen Jethu tiəp ku rəəth raan nyin bī daai, ee ya aköl cīi kəc ye luui. 15 Go kəc akut Parathī mony wën bən thiëëc tē cī ye liep nyin thīn. Go lək ke, “Yeen aci tiəp tääu ɣanyin, ku laak ɣanyin, ku emən aləu ba piny tiŋ.”

16 Go kəc kək akut Parathī lueel, “Raan cī kënë looi acī ləu bī bən tənē Nhialic, rin aci löŋ cīi kəc ye luui thek.”

Go kəc kək lueel, “Ləu kədē bī raan la guöp adumuööm kädit jāŋ göi, cit kakkä, looi?” Gokë keyiic tek kamken.

17 Go kəc akut Parathī mony wën bən thiëëc, “Yīin ye lueel lən cī yen yī liep nyin apath, ku yīin ye lueel ye yen ŋa?” Go bəër, “Ee raan kək Nhialic tiŋ.”

18 Ee kēc bāny Itharel gam lən cī yen cəər ku ben nyin kuək, agut tē bī kek kəc ke dhiëth ye cəəl, 19 ku thiëckē ke, “Ye manhdun kënë? Ayakē lueel lən cī ye dhiëth ke ye cəər, ləu kədē, bī piny tiŋ?”

20 Go wun ku man bəër, “Aŋicku lən ye yen manhda, ku lən cī ye dhiëth ke ye cəər. 21 Ku akucku tē cī yen piny jāl tiŋ thīn, ɣok aa kuc raan cī ye liep nyin aya. Thiëckē, yeen aci dīt ku aləu bī kēde bəër ē rot.” 22 Wun ku man aaci jam kələ rin riöc kek bāny Itharel, rin cī kek ye mat lən kuat raan gam Jethu lən ē yen Raan cī ləc ku dəc, ka dhil cuəp wei tən amat kəc Itharel. 23 Rin kënë, yen ē lueel wun ku man ye əlä, “Yeen aci dīt, thiëckē!”

24 Gokë mony wën cī dhiëth ke cī cəər bən cəəl arak dēt, ku lëkkē ye, “Kuëŋ ē Nhialic nhom lən

bī yīn yic lueel. Aŋicku lɔn mony kēnē ē raan adumuõõm.”

²⁵ Go mony wēn bēēr, “Akuõc lɔn ye yen raan la guõp adumuõõm, wēt yen ŋiɛc, ɣen a ɣa ye cɔr ku ěmēn ɣen ē piny tīŋ.”

²⁶ Gokē thiēc, “Yenõ cī looi tēnē yīn? Cī nyiēnku kuek kēdē?”

²⁷ Go bēēr, “Aca lēk we wēnthɛɛr, ku acāk ye piŋ. Ye rin ŋõ wīc wek wēt bāk bɛn piŋ? Tēdēt wiēcckē aya bāk ya kɔcken ye buõõth?”

²⁸ Gokē lat ku luelkē, “Yīn aci ya raanden ye buõõth, ɣok aa kɔc Mothith. ²⁹ Aŋicku lɔn cī Nhialic jam tēnē Mothith, ku na ye monytui, ka cɔkku kuc aya tē bīi yen thīn!”

³⁰ Go mony wēn bēēr, “Kē gēi kɔc akīn! Akuõckē tē bīi yen thīn, ku yeen guõp aci nyiēnkiē liep!

³¹ Aŋicku lɔn cīi Nhialic wēt kɔc adumuõõm ye piŋ, ku yeen ē wēt kɔc thek ye ku loikē luõiden cī lēk ke piŋ. ³² ɤonthɛɛr cɛk pinynhom akēc kaŋ piŋ lɔn le yen raan cī dhiēēth ke ye cɔr cī kuek nyin. ³³ Na cie lɔn bīi raan kēnē tēnē Nhialic, ka cīi lēu bī kēcīt kēnē looi.”

³⁴ Gokē bēēr, “Yīn aci dhiēēth ku muk yī adumuõõm yic, ku wīc ba ɣo piõõc?” Ku copkē wei tēnē amat.

Cöör ë pušu

³⁵ Go Jethu piŋ lɔn cī kek ye cuõp wei. Nawēn yök ke lueel, “Ye wēt Manh Raan gam?”

³⁶ Go mony wēn bēēr, “Bēny, lēk ɣa ye ŋa, rin ba lēu ba gam.”

³⁷ Go Jethu lēk ye, “Yeen aca tīŋ, ku yen ē raan jam kek yī ěmēn.”

38 Go mony wën lueel, “Bëny aca gam.” Ku gut yenhiəl piny Jethu nhom.

39 Go Jethu lueel, “Υεν aci bën pinynhom tën ba wët teem, rin bī cōr piny tīj, ku bī kōc piny tīj jāl cōr.”

40 Go kōc kōk akut Parathī rëër kek ye wël cī lueel piŋ ku thiëckë, “Ee ciët wic ba lueel lōn ye yōk cōr aya?”

41 Go Jethu bëër, “Na we ye cōr ke wek aa cīn gup awuōc, ku rin ye wek ye lueel lōn ye wek piny tīj, ke wët kënë aye nyooth lōn le wek gup awuōc.”

10

Kääŋ abiöök

1 Go Jethu lueel, “Wët yic alëk we, raan cie tëek kal amël thok, ku lir nhom tädët, yeen ë cuär, ku ë raan rum kãŋ. 2 Ku raan tøk kal thok yen abiöŋ amël. 3 Raan tit kal abī kal ŋaany thok tënë ye, ku piŋ amël rölde tē cōl yen amälke ë rienken, ku thel ke ayeer. 4 Ku tē cī ke yäth ayeer, ka cath tuenŋ kenhüim ku buōth amël cök rin ŋic kek rölde. 5 Aacī raan dët bī buōth cök, aabī kat ye rin kuc kek rölde.”

6 Kääŋ kënë aci Jethu thäth ke, ku wët lueel tënë ke akëckë deet yic.

Jethu abiöŋ path

7 Go Jethu bën lueel, “Wët yic alëk we, yēn ee kal thok tënë amël. 8 Kōc kōk ëbën cī kãŋ bën yanhom tuenŋ, aa cuär ku aa kōc rum kãŋ, ku rōlden akëc amël piŋ. 9 Υεν ë kal thok. Raan bö thīn thuŋdië abī luök, yeen abī bën alŋthīn ku ler ayeer, ku yök

wel path. ¹⁰ Cuär ë bën rin bi cuëer, ku nek käñ ku rɛc ke. Ƴen aci bën bik pir yök, pirdit alanden.

¹¹ “Ƴen abiön path. Abiön path aye wic bi thou rin amälke. ¹² Raan lui ariöp ku cie raan abiök ku cie wun amël, ku tñ gəl ke bö, ka päl amël ku ket, bi gəl thuæt amël yiic ku thiëi ke roor. ¹³ Raan lui ariöp ë kat rin ë raan lui ariöp ë path, ku aliu puöu kegup.

¹⁴⁻¹⁵ “Ƴen abiön path. Cimën ñic Wä Ƴen ku ñic Wä, këya Ƴen anic amälkië ku amälkië aa ñic Ƴa. Ku awiëc ba thou ë rienken. ¹⁶ Amël kök aa tö thñ ku aa kækkië ku aa liu thñ kal këne yic. Keek aaba bëi aya, ku aabi röldië piñ, ku keek aabi ya luöny tökaliñ kek raan töñ biök ke.

¹⁷ “Wä anhiar Ƴa rin awiëc ba piërdië puöl rin bi Ƴen ye bën yök. ¹⁸ Acin raan bi piërdië nyaai tene Ƴa. Yeen aya puöl wët piändië ë rot. Ƴen ala riel ba päl wei, ku Ƴen ala riel ba bën lööm.”

¹⁹ Go kɔc Itharel keyiic bën tek kamken rin ë wëlkä. ²⁰ Kɔc juëc kamken aa yekë lueel, “Yeen ala guöp jəñrac! Yeen amuöl! Yenö ye wek wëlke piñ?”

²¹ Go kɔc kök lueel, “Lëu raan la guöp jəñrac bi jam cimën yen! Lëu jəñrac këdë bi cɔr cəl akuek yenyin?”

Kɔc Itharel aa kuec Jethu

²² Aköl looi Yan Döc luan Nhialic Jeruthalem aci bën, ku piny ë ye mëi. ²³ Ku Jethu ë cath puak yic, cəl puak Tholomon tö luan Nhialic. ²⁴ Go kɔc Itharel guëer yelööm ku luelkë, “Ƴet nen bi yin Ƴo cəl arëer Ƴo diu puöth? Lëk Ƴo yic la gëi, ye yin Raan ci löc ku döc?”

25 Go Jethu bēēr, “Wēt aca lēk we ku wek aacie wētdiē ye gam. Luōikiēn ya looi ē riel Wā, kek ajam ē rienkiē. 26 Ku wek aacie wētdiē ye gam rin cīi wek ye amālkiē. 27 Amālkiē aa rōldiē piŋ ku keek aŋiēc ku keek aa ɣa buo̯th cōk. 28 Pīr akōlriēēc ēbēn aya yiēk ke, ku keek aaciī bī kaŋ thou athēer, ku aciŋ raan lēu ye bī ke rum tēnē ɣa. 29 Kē cī Wā yiēk ɣen awār kēriēēc ēbēn, ku aciŋ raan lēu ye bī ke rum Wā cin. 30 Wā ku ɣen ɣok aa tōk.”

31 Go kōc Itharel aleel bēn kuany bīk biōōk. 32 Go Jethu lēk ke, “Luōi puo̯th juēc cī Wā yiēk ɣen ba ke looi, aa ca looi wenhūim, ye luōi tōŋ nēn kamken yen wīc wek ye bāk ɣa biōōk aleel?”

33 Go kōc Itharel bēēr, “Yīn acuk wīc buk yī biōōk aleel rin luōi path, ku ē rin ye yīn Nhialic dāl guōp. Yīn ē raan ē path, ku wīc ba rot looi ba ya Nhialic!”

34 Go Jethu bēēr, “Acī gōt lōŋdun yic guōp lōn cī Nhialic ye lueel, ‘Wek aa Nhialic.’ 35 Aŋicku lōn wēt cī gōt athōr wēl thēer Nhialic yic ē yic alanden, ku kōckā aci Nhialic cōl, ‘Nhialic,’ kōc cī Nhialic thōn wētde. 36 Ku na ɣen, ke Wā cā cōl ku tuuc ɣa pinynhom, ku ye kēdē ye wek ye lueel lōn cī ɣen Nhialic dāl, ye rin cī ɣen ye lueel lōn ye ɣen Wēn Nhialic? 37 Duōkkē wētdiē gam tē cīi ɣen luōi Wā loi. 38 Ku na ya ke looi, ku cōk alōn cīi wek wētdiē gam, ke we dhil luōikiē gam, bāk ŋic alanden lōn Wā arēēr kek ɣa ku ɣen atō Wā yic.”

39 Gokē wīc bīk dōm, go ke kāl nyīn.

40 Go Jethu bēn dhuk ciēēn wār Jordan alōŋtui tēwāār ye Joon kōc muōoc nhūim thīn, ku rēēr thīn tēēn. 41 Go kōc juēc bēn tēnē ye ku luelkē, “Joon akēc

käiril looi, ku keriëc ebën cī lueel rin ë mony kënë aaci ya yith.” ⁴² Ku gam koc juëc wëtde ë tënë.

11

Thon Ladhäro

¹ Raan cöl Ladhäro, ku ë rëer Bethani, ëcī tuaany. Bethani ë gen rëer Maria thīn kek nyankën cöl Martha. ² Maria kënë yen ë nyan wäär cī Bānyda təc cök miök njir, ku wuuny ke nhiëmke. Ku ë mēnhē Ladhäro yen ëcī tuaany. ³ Go nyiërakën wët tuöc Jethu, “Bēny, mäthdun nhar aci tuany.”

⁴ Nawën piŋ Jethu ke lueel, “Tueny kënë acii Ladhäro bi nök, kënë aci rot looi bi Nhialic leec thīn. Ku yen ë tē bi Wēn Nhialic læc yök thīn.”

⁵ Ku Jethu ë nhar Martha kek nyankën ku Ladhäro. ⁶ Nawën cök piŋ lön cī Ladhäro tuaany, ke näk nīn karou tēwēn rëer yen thīn. ⁷ Ku jöl læk koc ye buəth, “Benku dhuk ciëen pan Judia.”

⁸ Go koc ye buəth lueel, “Raan piöc, wäär emēn thiöök, ee wic koc Itharel bik yi biöök aleel, ku ye wic emēn ba ben dhuk thīn?”

⁹ Go Jethu bëer, “Akäl tök cī yic la aköl ku waköu? Tē cieth raan ke ruel dit ke yeen acie köth, rin ala ruel yen piny tiŋ. ¹⁰ Ku na cieth waköu ka köth, rin liu ruel tēnē ye.” ¹¹ Jethu aci wēlkä lueel ku mæt dēt thīn, “Mäthda Ladhäro aci nīn wit, ku yen ala ba la puöc.”

¹² Go koc ye buəth lueel, “Bēny, na cī nīn ka bi ηuëen.”

¹³ Ku wët wic Jethu bi læk ke ë lön cī Ladhäro thou. Gokē tak lön jīem yen wët nīn ë path. ¹⁴ Go Jethu

gai yic tēnē ke, “Ladhäro aci thou, ¹⁵ku yēn aci puōu miēt ē rienkun ba kēc rēer kek ye, rin bāk gam. Jolku la tēnē ye.” ¹⁶Go Thomath, cōl Acueek, lēk atuuc, “Lokku yodhie kek Raan piöoc, rin buk la thou kek ye.”

Jön rot ku pīr aabō tēnē Jethu

¹⁷Nawēn yet Jethu ke yök lōn cī Ladhäro thiök ka la nīn kaṅuan raṅ yic. ¹⁸Bethanī amec kek Jeruthalem tēcīt tēn meel karou, ¹⁹ku kōc juēc Itharel aake cī bēn bīk Martha kek Maria bēn dēet puōth, rin wāmēnhdēn cī thou.

²⁰Nawēn piṅ Martha lōn bīi Jethu, ke la ayeer bī la rōm kek ye, ku dōṅ Maria bei. ²¹Go Martha lēk Jethu, “Bēny, na yī tō thīn, ṅuōt wāmāāth akēc thou. ²²Ku aṅiēc lōn na cōk amēn ke Nhialic abī kēriēc ēbēn ba thiēc ye, gām yī.”

²³Go Jethu lēk ye, “Wāmuuth abī rot jōt bī pīr.”

²⁴Go Martha bēer, “Aṅiēc lōn bī yen rot jōt bī pīr akōl ciēn.”

²⁵Go Jethu lēk ye, “Yēn ē jōn rot ku pīr. Raan gam wētdiē, na cōk alōn thou yen ka bī pīr. ²⁶Ku kuat raan pīr ku gēm wētdiē aciī bī kaṅ thou. Ca kēnē gam?”

²⁷Go lueel, “Ee kēya, Bēny. Aca gam lōn ye yīn Raan cī lōc ku dōc, Wēn Nhialic, bī dhiel bēn pinynhom.”

Jethu adhiau

²⁸Nawēn cī Martha wēlkā lueel, ke dhuk ciēn ku cōl nyanakēn Maria amāāth ku lueel, “Raan piöoc atō tēn ku awic yī.” ²⁹Nawēn piṅ Maria wēt kēnē, ke jōt rot ku lōc la ayeer bī la rōm kek ye. ³⁰Ku Jethu ē ṅot kēc yet baai, a ṅot rēer tēwēn rēm yen

thïn kek Martha. ³¹ Go kɔc Itharel wën rëër yööt kek Maria rin bik dæst puðu, buoθh cök, wën tïj kek ye ke cï rot jɔt ku bën yeköu ayeer. Ee cïk tak lɔn ler yen rañ nhom bi la dhiau thïn.

³² Wën yeet Maria tëwën rëer Jethu thïn, ke cuet rot piny yecök ku lueel, “Bëny, na yï tō thïn tën ηuöt wämääth akëc thou.”

³³ Nawën tïj Jethu ke dhiau, ku kɔc Itharel awën ruεc ye ke dhiau aya, go keñ yepuðu ku ηeer yic apɛi. ³⁴ Go ke thiëc, “Cäk thiök tëno?” Gokë lueel, “Bëny, bäär ba tïj.”

³⁵ Go Jethu dhiau. ³⁶ Go kɔc Itharel lueel, “Tiëñkë tē nhiεer yen ye thïn.”

³⁷ Go kɔc kök kamken lueel, “Acï raan cï cɔar liep nyin, këc looi? Ku yeñö këc yen Ladhäro kuöny bei thou yic?”

Ladhäro acï bën pïr

³⁸ Go Jethu yic bën ηeer apɛi ku ler rañ nhom, ku rañ ëci wec kuur yic, ku kuurdit acï tääu yethok.

³⁹ Go Jethu ke yöök, “Nyaaikë kuur.”

Go Martha, nyanakën raan cï thou bëer, “Bëny, acï nhiany. Nïn cï ye thiök aa ηuan.”

⁴⁰ Go Jethu lëk ye, “Këc lëk yï lɔn bi yïn lεc Nhialic tïj tē gëm yïn?” ⁴¹ Gokë kuur laar wei. Go Jethu yenyin ηäär nhial ku lueel, “Wä yïn alεc rin ye yïn ya piñ, ⁴² ku anjεc lɔn ye yïn ya piñ akölaköl, ku aluεel rin bi kɔc tō thïn tën ye gam, lɔn cï yïn ya tooc.”

⁴³ Kaam wën cï yen wëlkä lueel ke cöt röldit, “Ladhäro, bäär ayeer.” ⁴⁴ Go bën ayeer ke cï duut cök ku cin alanh thiëkthiëk, ku acï der nyin alath. Go Jethu lëk ke, “Däkkë ku calkë acath.”

Amat nêk Jethu

(Mt 26:1-5; Mk 14:1-2; Lk 22:1-2)

⁴⁵ Go kɔc juëc Itharel cï bën bïk Maria bën neem, kē cï Jethu looi tiŋ, ku gamkē wētde. ⁴⁶ Ku dhuk kɔc kōk ciëen kamken tēnē kɔc akut Parathï, bik kāk cï Jethu looi la lëk ke.

⁴⁷ Go kɔc akut Parathï ku kɔc kāk Nhialic mat kek bēny luk, ku luelkē, “Buk ŋö looi? Mony kēnē ee luoi ril apei looi! ⁴⁸ Na pälku bi la tuenj kēlä, ke kɔc ebēn abï wētde gam, ku bāny Roma aabi bën bïk luanj Nhialic thuör piny ku rēckē panda.”

⁴⁹ Go Kaipa yen ye raandit kɔc kāk Nhialic ē ruöön kēnē lueel, “Wēt tōk akuöckē! ⁵⁰ Cäk ye tiŋ lön aŋuëen tēnē we bi raan tōk thou rin kɔc, tēn tē bi wuönda riääk ebēn?” ⁵¹ Ku akēc wēt kēnē lueel piände ē rot, ku ē rin ye yen raandit kɔc kāk Nhialic ē ruöön kēnē. Ku ē luel kāk tuenj bi röt looi lön bi Jethu thou rin thän Itharel, ⁵² Ku acie rienken kepēc, abï thou aya bi mïth Nhialic cï thiëi pinynhom kuööt yiic bïk aa tōk.

⁵³ Joak aköl kēnē ke bāny aake guir bïk Jethu nök. ⁵⁴ Kēya, go Jethu kēc ben acath ē path kam kɔc pan Judia, ku jiël bi la gen cöl Epraim tēthiök ke ror, ku rēer thïn kek kɔc ye buöth.

⁵⁵ Ku Yan Ayum cïn yic luoi kɔc Itharel ecï thiök, go kɔc juëc jäl bääiken yiic bïk la Jeruthalem, bik kōc wuuny kek kegup yandit nhom tuenj la looi. ⁵⁶ Gokē Jethu wïc, ku thiëckē röt kamken wēn cï kek guëer luanj Nhialic, “Yenö yakē tak? Bi bën yai yic, kua cïi bi bën?” ⁵⁷ Ku kɔc kāk Nhialic ku kɔc akut Parathï aake cï wēt lueel, lön raan ŋic tē rēer Jethu thïn adhil wēt lëk ke, ku bi döm.

12

Maria aci tē theek yen Jethu thïn nyuəəth
(Mt 26:6-13; Mk 14:3-9)

¹ Nïn kadätem Yan Ayum cïn yic luəu nhom tueŋ, ke Jethu la Bethani, pan ciəŋ Ladhäro thïn, raan wäär cï jöt bei thou yic. ² Gokë miəth guiir tənë ye, miəth cï Martha bën luui thïn apei. Ku Ladhäro atō kam kəc ke rëer thïn aya. ³ Go Maria karjac cï thiäŋ miök n̄ir cəl naar, ye ɣəəc wëəu juəc lööm, ku puk Jethu cök ku wuuny nhimken nhom. Go an̄ir miök ɣöt rum yic ebën. ⁴ Go raan tōk kam kəc Jethu buəəth, cəl Judath Ithkariöt, raan bï ye luəm lueel, ⁵ “Yeŋö kəc miök n̄ir kënë ɣaac wëəu juəc wär wëəu ye döm raan tōk, ku yik ke kəc n̄əŋ?” ⁶ Ku ëcie rin nhiër kəc n̄əŋ yen lueel yen kënë, ee rin ye yen cuär, ee ye wëəu akut muk, ku ë ye rot kony thïn.

⁷ Go Jethu lueel, “Pälkë, calkë amuk miök rin aköl bï ɣa thiök. ⁸ Kəc n̄əŋ aabi rëer thïn akölaköl kek we, ku ɣen aciï bï rëer kek we akölaköl.”

⁹ Go kəc juəc Itharel jäl n̄ic lən tō Jethu Bethani, gokë la thïn, ku acie rin Jethu yetök, ee rin bïk Ladhäro la tiŋ aya, raan wäär cï Jethu jət kam kəc cï thou. ¹⁰ Go kəc kək Nhialic wët mat yic bïk Ladhäro nök aya, ¹¹ rin wët Ladhäro yen aye kəc juəc Itharel bānyken puöl ku gamkë wët Jethu.

Jethu aci la Jeruthalem ke ciëm yai
(Mt 21:1-11; Mk 11:1-11; Lk 19:28-40)

¹² Naɣən nhiääk dët ke akutdüt kəc cï bën Yan Ayum cïn yic luəu yic, piŋ wët lən bïi Jethu

Jeruthalem. ¹³ Gokë ayör agëp lööm, ku lek bik la lor, ku ketkë ëlä,

“Lec tənë Nhialic!

Nhialic dəc raan bö rin Bëny!

Nhialic dəc Bëny Itharel!”

¹⁴ Go Jethu akaja yök ku nyuuc yeköu, cît tē cî gät ye athör thëer wël Nhialic yic,

¹⁵ “Duökkë riöc kəc Itharel! Yen kïn, Bänydun abö, ke cî nyuc akaja köu.”

¹⁶ Ku kakkä aake këc kacken ye buoath deet yiic, nawën cî Jethu rot jöt ke lec, ke jolkë njic lön cî kakkä göt athör thëer wël Nhialic yic, ku lön cî kek kakkä looi tənë ye.

¹⁷ Ku kəc juëc ke rëer thïn wäär cî Jethu Ladhäro caal ayeer ran yic, ku jöt kam kəc cî thou, aake kë cïk tïj tët kəc. ¹⁸ Ku rin wët kënë aya yen aa lor kəc juëc ye, rin cî kek luoidit jän göi cî looi piñ. ¹⁹ Go kəc akut Parathï lueel kamken, “Cäk ye tïj lön cïn yen kë yökku thïn. Tiënkë, aye thëi ëbën buoath cök.”

Kəc Gïrik kök aa wïc Jethu bik tïj

²⁰ Kəc Gïrik kök aake tö kam kəc cî la Jeruthalem bik Nhialic la door thïn. ²¹ Gokë bën tənë Pilipo, raan Galilia pan Bethaida ku luelkë, “Bëny, yok aa wïc Jethu buk tïj.”

²² Go Pilipo wët lëk Andria, ku lekkë karou tənë Jethu bik la lëk ye. ²³ Go Jethu bëer, “Ëmën, aköl bï Manh Raan ya leec apci acï guo yëët. ²⁴ Wët yic alëk we, nyin rap ë rëer ke ye tök ë path, tē këc ye tääu tiöp yic bï ciët kë cî thou. Na le yic pät bï ciët kë cî thou, ka jöl luok mith juëc. ²⁵ Raan nhïar piërde, abï muör ku raan man piërde pinynhom tën abï

muk tēnē pīr akōlriēec ēbēn. ²⁶ Kuat raan wīc ye bī ɣen luōōi ka dhil ɣa buōōth cōk, rin tē rēēr ɣen thīn, aluonydiē abī rēēr thīn aya, ku Wā abī kuat raan luui ɣa leec.

Jethu ajam wēt Thuōnde

²⁷ “Piāndiē arem emēn, ku ba ḡō lueel? Ba lueel, ‘Wā, duk kēreec tit ɣa cōl abō?’ Ku kēnē ē yen cī ɣen bēn thīn, rin ba arem akōl kēnē thōl. ²⁸ Wā, cōl rienku alec!”

Go rōl jam nhial ku lueel, “Aca cōl alec ku aba bēn cōl alec.”

²⁹ Go kōc ke kāāc thīn tēēn rōl piḡ ku luelkē, “Deḡ acī mār.” Go kōc kōk lueel, “Atuny Nhialic acī jam tēnē ye.”

³⁰ Tēēnē, go Jethu lēk ke, “Ee cie tēnē ɣa yen jīem rōl kēnē, ee rienkun. ³¹ Emēn, ē tē bī luk teem tēnē kōc tō pinynhom, ku bēny jakreec abī cuōp wei. ³² Tē cī ɣa jat nhial, ke ɣen abī kōc ēbēn miēēt tēnē ɣa.” ³³ Ku wēn lueel yen kēnē, ke wīc bī nyuōōth yen tē bī yen thou thīn.

³⁴ Go akut bēēr tēnē ye, “Wēt cī ḡōt athōr yic ē ɣok lēk lōn bī Raan cī lōc ku dōc, pīr akōlriēec ēbēn. Na yīin lēu kēdē ba lueel lōn bī Manh Raan jat nhial? Ku yeḡa yen Manh Raan?”

³⁵ Go Jethu bēēr, “Aḡoot tēthin nyōōt bī ruel rēēr kamkun. Lakkē tueḡ dhōldun yic emēn tōu ruel tēnē we bī muōōth we cīi dōt, rin raan cath muōōth yic akuc tē ler yen thīn. ³⁶ Gamkē ruel emēn ḡoot yen kek we, rin bāk aa kōc ruel.” Tēwēn cī Jethu wēlkā lueel ke la ayeer ku thiēen rot tēnē ke.

Kɔc Itharel aa kuc ɛ gam

³⁷ Na cɔk amɛn ci yen luɔi rilkɔ ɛbɛn looi kenhiiim guɔp, ke keek aa kɛc wɛtde gam, ³⁸ bi wɛt ci Ithaya, raan kɔk Nhialic tiŋ kaŋ lueel thɛɛr yenhom tiɛɛŋ, wɛtɛden wɔɔr lueel ɛlɔ,

“Bɛny, yeŋa ci wɛt cuk lɛk kɔc gam?”

Yeŋa ci Bɛny nyuɔth riɛl?”

³⁹ Ku rin ɛ kɛnɛ acin tɛ bi kek gam, rin wɛt kɛnɛ aya, aci Ithaya lueel ɛlɔ,

⁴⁰ “Aaci Nhialic dhɔny nyin, ku mɛr kepuɔth.

Bik kaŋ ci tiŋ kenyin, ku cik wɛt det kepuɔth.

Bik rɔt wɛl ɣɛn ku ba keek kony.”

⁴¹ Ithaya aci kɛnɛ lueel rin ci yen lɛc Jethu tiŋ ku jiiɛm riɛnke.

⁴² Ku ɛmɛn aya, ke bɔny kɔc Itharel aake ci wɛt Jethu gam, ku akɛckɛ lueel kɔc nhiiim, rin riɔc kek kɔc akut Parathi bik ke ci cop wei tɛn amat. ⁴³ Aake lɛc kɔc nhiaar tɛnɛ lɛc Nhialic.

Jethu abi luk looi tɛnɛ kɔc ɛbɛn

⁴⁴ Go Jethu lueel rɔldit kɔc nhiiim, “Raam gam wɛtdiɛ acie wɛtdiɛ rot yen ye gam, ee wɛt raan toc ɣa gam aya. ⁴⁵ Ku raan tiŋ ɣa, ka tiŋ raan cɔ tooc aya. ⁴⁶ ɣɛn aci bɛn cimɛn ruɛl pinynhom, bi raan ɛbɛn gam wɛtdiɛ ci ben rɛɛr muɔɔth yic. ⁴⁷ Raan piŋ wɛtdiɛ ku ci lɔk looi, ke ɣɛn acin wɛt ba tɛm ye, rin kɛc ɣɛn bɛn ba kɔc pinynhom bɛn luk, ɣɛn aci bɛn ba ke bɛn piir. ⁴⁸ Raan kuc ɛ ɣa ku ci wɛtdiɛ gam, raan bi ye tɛm awuɔc abi tɔ thɛn, ku wɛtdiɛn ca lɛk kɔc abi ye luk akɔl ciɛɛn. ⁴⁹ Ku ɛ kɛya, rin kɛc ɣɛn jam wɛt piandiɛ rot, ku ɛ Wɔ Aciɛŋ toc ɣa, yen aci ɣa thɔn kɛ ba dhiɛl lueel ku jaam ɛ yic. ⁵⁰ Ku

aŋɨɛ lɔn ye wētde pɨr akōlriëc ebën bēi. Käk ya lueel aa käk cī Wä nyuōth ɣa ba ke lueel.”

13

Jethu aci kacken ye buoath loak cok

¹ Ee ye akōl Yan Ayum cīn yic luou nhom tueŋ. Go Jethu ŋic lɔn cī akōl jiël yen pinynhom tēn jāl bēn, ku bī la tēnē Wun. Yeen aci kacken rēer pinynhom nhiaar alanden, ku nhiεer ke ɣet tē bī wēt thök.

² Jethu ku kacken ye buoath aake cī nyuc bīk miēth thēi cam. Ku jəŋrac ēci wēt tāau Judath, wēn Thaimon Ithkariöt puou, bī Jethu gaany. ³ Go Jethu ŋic lɔn cī Wun riel ebën tāau yecin, ku ē ŋic lɔn cī yen bēn tēnē Nhialic, ku ē ben dhuk tēnē ye. ⁴ Go rot cuot wei tēwēn mīth kek thīn ku dək alanh kōu, ku ruk alanh wuōny ye aŋum. ⁵ Ku jəl pīu puök aduök yic ku loak kacken ye buoath cok, ku wuuny ke alanh wuōny wēn cī ruök ye aŋum. ⁶ Ku jəl bēn tēnē Thaimon Piter, go Piter lək ye, “Ye yīn bā loak cok, Bēny?”

⁷ Go Jethu bēer tēnē ye, “Ke luoui acii ye deet yic emēn, ku aba lök deet yic.”

⁸ Go Piter lueel, “Yīn acii ɣa bī kaŋ loak cok acin.” Go Jethu bēer, “Na cā yī lök cok, ke yīn acin tē bī yīn ben a raandiē.”

⁹ Go Thaimon Piter lueel, “Bēny, na ye këya ke yī duk ɣa lök cok ē rot, lök ɣacin ku ɣanhom aya.”

¹⁰ Go Jethu lueel, “Raan cī laak acin guöp acuol, ku abī yecök loak rot. Wek aa ɣer ebën, ke raan tök kamkun yen acii ɣer.” ¹¹ Jethu ē ŋic raan bī ye gaany, yen ē lueel yen ye elä, “Wek aa ɣer wedhie, ke raan tök yen acii ɣer.”

¹² Nawën cï Jethu ke ləok cök, ke ben alanhde ruök ku nyuuc tēden wën rēer yen thïn, ku thiēc ke, “Cäk käk ca looi tēnē we emēn deet yiic? ¹³ Wek aa ya cəal raan piöoc ku Bēny, ku yeen apath bāk looi këya, rin ē ya. ¹⁴ Үен ē Bēny ku Raan piöoc tēnē we, ku ɲot we laak cök. Ke week aya, wek aabi wecök ləok kamkun, ɲek kek ɲek. ¹⁵ Wēt path aca nyuŋth we, bāk looi cimēn cï Үен ye looi tēnē we. ¹⁶ Wēt yic alək we, acin alony dit tēnē bānyde, ku acin atuny dit tēnē raan toc ye. ¹⁷ Emēn ɲic wek wēt yic kēnē, tē looi wek ye, ke miət puəu dit abäk yök thïn.

¹⁸ “Үен acii jam ē rienkun ebēn, Үен aɲic kəc ca kuēny bei. Ku wēt cï gət athör thēer wəl Nhialic yic elä, ‘Raan mīth yok aduəɲ tək yic acie nhom wəl ya,’ adhil yenhom tiēɲ. ¹⁹ Wek aa lək wēt kēnē emēn ke kēc rot guə looi, rin aköl bi yen rot looi ka bāk jäl gam lən, ‘Ye Үен Yeen.’ ²⁰ Wēt yic alək we, raan lor raan ca tooc, acä lor aya, ku raan lor Үен ka lor raan toc Үен aya.”

Kē cïn Judath puəu acï lueel

(Mt 26:20-25; Mk 14:17-21; Lk 22:21-23)

²¹ Nawën cï Jethu wēlkä lueel, ke ɲēer yic ku lueel, “Wēt yic alək we, raan tək kamkun abi ya gaany.”

²² Go kəc ye buəth kenyin liäath kamken ke cï nhüim la dil apēi wēt ye lueel. ²³ Ku raan tōɲ nhiēer Jethu kam kəc ye buəth, ecï nyuc Jethu lööm, ²⁴ go Pīter nieu nyin ku lueel, “Thiēc, ye raan nēn yen jiēem yen rienke.”

²⁵ Go atuny kënë rot cuöt Jethu ku thiëc, “Bëny, ye yen ë ña?”

²⁶ Go Jethu bëër, “Ee raan bi ãen ayup luöt kada yic ku yiëk ye.” Ku lööm ayum ku lut kada yic ku yik Judath, wën Thaimon Ithkariöt. ²⁷ Tëwën lööm Judath ayup, ke jöñrac go la yeguöp. Go Jethu lëk ye, “Kë wïc ba looi, lóc looi.” ²⁸ Ku acin raan kam kóc ke mïth kek ye cï wët deet yic, ye rin nõ yen jiem Jethu këya tënë ye. ²⁹ Ku rin yen Judath yen wëëuken muk, ke cï kóccken kök tak lön cï Jethu ye lëk ye bi la ɣöc kä wickë rin yai, tädë ke cï lueel bi kóc nõñ muöc.

³⁰ Ku kaam wën lööm Judath ayup, ke la ayeer. Ku ë ye waköu.

Löñ Yam

³¹ Wën cï Judath jäl, ke lueel Jethu, “Ëmën læc Manh Raan aci nyuöth kóc, ku læc Nhialic aci nyuöth kóc ë ye. ³² Ku tē cï læc Nhialic nyuöth kóc ë ye, ke Nhialic abi læc Manh Raan nyuöth yeguöp, ku abi lac looi nyin yic. ³³ Miëthkië, ãen acii bi rëer kek we apɛi. Wek abä wïc, ku alëk we ëmën yen wët ca lëk kóc Itharel, ‘Acin tē bi wek la tē ler ãen thïn.’ ³⁴ Löñ yam ayiëk we, nhiarkë röt kamkun, cimën cï ãen we nhiaar, këya, ke wek aa dhil röt nhiaar kamkun. ³⁵ Na nhiarkë röt kamkun ka bi ñic kóc ëbën lön ye wek kockiën ɣa buöth.”

Pïter ajɛi Jethu

(Mt 26:31-35; Mk 14:27-31; Lk 22:31-34)

³⁶ Go Thaimon Piter thiëc, “Na yïin lərdë Bëny?” Go Jethu bëër, “Të ler yen thïn acïn të buoθh yïn yacök emën, ku yïn abä buoθh aköldä.”

³⁷ Go Piter thiëc, “Bëny, yenjö cïi yen ye lëu ba yï buoθh emën? Atöu yapuöu ba thou ë rienku.”

³⁸ Go Jethu bëër, “Lëu ba thou alanden ë rienkië? Wët yic alëk yï. Të not këc thən ajith kiu, aba lueel arak diäk lən kuc yïn ya.”

14

Jethu ee dhël la tənë Wun

¹ Go Jethu lëk ke, “Duökkë diëer ku rëërkë we rac puoθh. Gamkë Nhialic ku gamkë ya aya. ² Pan Wä ala yic yööt juëc, ku yen ala ba piny la guuir tənë we. Na cie yic wët kënë, ηuöt akëc lëk we. ³ Ku të cï yen la ba piny la guuir tənë we, ke yen abï dhuk ba we mat tēdië rin bāk rëer të tōu yen thïn. ⁴ Ku dhël bi wek yet të le yen thïn anjickë.”

⁵ Go Thomath lëk ye, “Bëny, yok aa kuc të le yïn thïn, ku buk dhël bi yok yet të tō yïn thïn ηic kēdë?”

⁶ Go Jethu bëër tənë ye, “Yen ee dhël ku yic ku pïr, acïn raan la tənë Wä të cïi yen rienkië.” ⁷ Ku lëk ke, “Emën cï wek ya ηic, ke wek aabi Wä ηic aya, ku emën yet tuen, anjickë ku acäk tïη.”

⁸ Go Pilipo lueel, “Bëny, nyuoθh yo Wuur, yen ee kë wicku yetök.”

⁹ Go Jethu bëër, “Yen aci cenj apai kek we, ku yïn anot yï këc ya ηic, Pilipo? Raan cä tïη, aci Wä tïη aya. Yenjö ë yïn ye lueel, ‘Nyuoθh yo Wuur?’ ¹⁰ Këc gam yïn Pilipo, lən rëer yen Wä yic ku Wä yayic?” Ku jəl Jethu lëk kocken ye buoθh, “Wël ca lëk we aacie wël bö bei tənë ya. Wä rëer yayic, yen ë luide looi.

11 Gamkë wëtdië lön rëer γen Wä yic ku lön tō Wä γayic. Na liu gam ke gamkë rin luōikië. 12 Wët yic alëk we, raan gam wëtdië abī luōi ya looi a looi, ku tēdēt abī luōidit tēnē luōidië a looi, rin ler γen tēnē Wä. 13 Ku kēriëc ebēn bāk thiëc ë riēnkië aba looi, rin bī lēc Wun nyuōth rin Wēnde. 14 Tē thiëc wek kēdān ë riēnkië, ka ba looi.

Athön bī Wēi Nhialic bēn

15 “Na nhiarkë γa, ke we piŋ löōŋkië. 16 γen abī Wä thiëc ku abī we yiëk raan dēt kōc kony, ku ye Wēi ë yic bī rëer kek we akōlriëc ebēn. 17 Acin tē bī kōc pinynhom ye gam, rin acik lēu bik tīŋ ku cīk lēu bik ŋic. Ku yeen aŋiēckē rin yen adōŋ kek we ku aciēŋ kek we.

18 “Wek aacā bī puōl wepēc, γen abī dhuk tēnē we. 19 Aŋoot tēthin-nyōt ku kōc pinynhom aaciū γa bī bēn tīŋ ku wek aabā tīŋ, ku rin pīr γen, ke wek aabī pīr aya. 20 Tē ler akōltui bēn ka bāk ŋic lön tō γen Wä yic ku lön rëer γen weyiic.

21 “Raan gam löōŋkië ku looi ke, yen ë raan nhiar γa. Ku raan nhiar γa abī Wä nhiaar, ku yeen aba nhiaar aya, ku γen abī rot nyuōth ye.”

22 Go Judath lueel, ku yeen acie Judath Ithkariöt, “Bēny, bī rot lēu kēdē ba rot nyuōth γo ku cīi rot nyuth kōc pinynhom?”

23 Go Jethu bēer tēnē ye, “Raan nhiar γa, ka piŋ wëtdië ku yeen abī Wä nhiaar, ku γok aabī bēn tēnē ye γok Wä buk pīr kek ye. 24 Raan cīi γa nhiar acie wëtdië ye piŋ. Wët cāk piŋ tēnē γa acie wëtdië, ee wët bō tēnē Wä raan toc γa.

25 “Wëlkä aaca lëk we ëmën ηoot γεν kek we. 26 Ku raan kɔc kony, Wëi Nhialic bī Wä tuöc ë rienkië yen abī we piöc këriëc ëbën ca lëk we.

27 “Döör aya nyään piny ke we, ku döördië guöp ayiëk we. Acä ye gäm we cīmën ye kɔc piny ye yiëk kɔc. Duökkë yiic ηεεr ku duökkë riäc. 28 Acäk piñ ke luεel tënë we ëlä, ‘Υεν ajiël ku γεν abī la dhuk tënë we.’ Na nhiarkë γa ke wek aabī puöth miët rin ler γεν tënë Wä, rin adit tënë γa. 29 Kënë aca lëk we ëmën ke ηot këc rot guo looi, na le rot looi ke bäk gam. 30 Acä lëu ba jam apëi kek we ëmën, rin jəñ pinyhom abö. Ku yeen acin riël tënë γa. 31 Ku adhil kɔc pinyhom ηic lən nhiεεr γεν Wä, yen ë rin ye γεν këriëc ëbën ye thön γa looi.

“Bäk, jiëlku tën.

15

Jethu yen abiëny yic

1 “Υεν abiëny yic ku Wä ë raan dom, 2 yen ee kuat kër cie luək tō yaköu teem wei, ku teem kuat kër luək nhom, rin bī nyäc bī ηiεc luək apëi. 3 Wek aaci jäl piath rin piöc ca yiëk we. 4 Rëërkë akut yic kek γa, ku γεν abī rëer akut yic kek we. Kër acie luək ë rot, alëu bī looi tē rëer yen abiëc yic. Këya, acäk lëu bäk luək tē cii wek rëer γayic.

5 “Υεν abiëc ku wek aa kër. Raan rëer γayic ku γεν yeyic abī luək apëi, rin week acin kë lëukë bäk looi tē liu γεν tënë we. 6 Raan cie rëer γayic ka ya cuat wei cīmën kër tim ku bī riël, ku kuat kërkä aabī kuööt yiic ku cuet ke mεεc tē bī kek dëp thïn. 7 Na rëërkë γayic, ku rëer wëlkië wepuöth ke këriëc ëbën bäk thiëc ku wiëckë, ka bäk yök. 8 Lεc Wä aye

nyuõth tē lok wek apei, ku këya, ke wek aabi ya kockiēn ya buõth. ⁹ Wek aa nhiaar cīmēn nhiēr Wā ɣen, rērkē nhiērdiē yic. ¹⁰ Na thekkē löñkiē ke wek aabi rēer nhiērdiē yic cīmēn cī ɣen lööñ Wā buõth yiic, ku rēer nhiērde yic.

¹¹ “Kēnē aca lēk we, bī miēt puõu tō tēnē ɣa tãu wepuõth aya, ku bī miēt piāndu thääp ē dīt. ¹² Ku löñdiē akīn, nhiarkē röt cīmēn cī ɣen we nhiaar. ¹³ Nhiērdīt tet lēu raan bī yiēk mǎthke, ee ɣem wēike ē rienken. ¹⁴ Ku wek aa mǎthkiē tē looi wek kāk ca lēk we. ¹⁵ Wek aacā bī bēn cōal aloony, rin alony akuc kāk ye wun baai looi. Ku wek aaya cōal mǎthkiē, rin cī ɣen kēriēec ēbēn ca piñ tēnē Wā nyuõth we. ¹⁶ Aacie wek cā lōc, ee ɣen aci we lōc, ku wek aaca tooc bāk la bāk la luui apei, luui bī döñ athēr. Ku Wā abi kēriēec ēbēn cāk thiēec ē rienkiē yiēk we, ¹⁷ kē thōn we akīn, nhiarkē röt kamkun.

Män kōc pinynhom

¹⁸ “Na man kōc pinynhom we, ke dhiēlkē tak lōn cī kek ɣa kañ maan. ¹⁹ Na we kōc pinynhom, ke kōc pinynhom aabi we nhiaar rin ye wek kacken, ku wēn cī ɣen we kuēny bei pinynhom, ke wek aacie kōc pinynhom, ku rin ē wēt kēnē, kōc pinynhom aa man we. ²⁰ Muõkkē wēt ca lēk we nhom, ‘Acīn alony dīt tēnē bānyde.’ Na jōrkē ɣa, ke keek aabi we jōör aya, na piñkē wētdiē, ke keek aabi wētdun piñ aya. ²¹ Ku keek aabi kākka looi ēbēn tēnē we rin ye wek kackiē, rin kuc kek raan cā tooc. ²² Na ɣa kēc bēn ku cā jam tēnē we, ñuõt aa kēc gup la adumuõm, ku cīt ēmēn kēlä, acīn tē bī ke bēn puõl

rin adumuõmken. ²³ Raan man ya, ee Wä maan. ²⁴ Na ya kęc luõikä kaᅇ looi kamken, käk cīn raan cī ke kaᅇ looi, ᅇuõt aa cīn gup adumuõm, cīt emēn kēlä, aaci käk ca looi tīᅇ, ku keek aa ᅇot ke man ya ku Wä aya. ²⁵ Ku kēnē adhil rot looi kēya bī wēt cī gõt lōᅇden yic rot tiεεᅇ, ‘Keek aa man ya ē path ke cīn wēt yic.’

²⁶ “Raan kuõony abī bēn, Wēi Nhialic abī yiny Nhialic nyooth, ku yeen abõ tēnē Wä. Yeen aba tuõc we tēnē Wä, ku yeen abī jam ē rienkiē. ²⁷ Ku week aya wek aabi jam ē rienkiē rin cī wek rēer ke ya thεεr.

16

¹ “Kēnē aca lēk we bāk gamdun cīi päl. ² Wek aabi cuõp wei tēn amat. Ku kaam abī bēn, tē bī kuat raan nāk we ye tak lōn na looi kēnē, ke yeen aluui Nhialic. ³ Keek aabi kākķä looi tēnē we, rin kuc kek Wä ku kuckē ya. ⁴ Kākķä aaca lēk we, rin akōl bī kek kākķä looi, ka jālķē tak lōn cī yēn ye kaᅇ lēk we.

Luõ Wēi Nhialic

“Wēlkä aa kęc lēk we wäär tuēᅇ rin rēer yēn kek we. ⁵ Ku emēn yēn ala tēnē raan cā tooc, ku aᅇot cīn raan kamkun ya thiēec, ‘Na yīin lōr dē?’ ⁶ Ku emēn cī yēn ye lēk we, wek aaci puõth jieth. ⁷ Wēt yic alēk we, aᅇuēēn tēnē we lōn jiēl yēn, rin na cā jiēl ke raan kōc kony aciī bī bēn tēnē we. Ku na jāl ke yēn aba la tuõc we. ⁸ Ku na bīi, ka bī nyuõth kōc pinynhom lōn rεεc kek rin wēt adumuõm, ku rin wēt ciεεᅇ path ku wēt luᅇ Nhialic. ⁹ Keek aa rεc rin wēt adumuõm, rin kęc kek ya gam, ¹⁰ rin wēt

ciεη path cī ladië tēnē Wä nyuəoth, ku kē cīi wek γen bī ben tīη. ¹¹ Ku keek aa rεc rin luk, rin cī bēny pinynhom tēn luök wei.

¹² “γen ala käjuēc kök ba lēk we, ku emēn aril yic bāk ke muk wenhīim. ¹³ Ku na bö Wēi Nhialic yen ē yic, ka bī we nyuəoth wēl yith ēbēn. Yeen acīi bī jam wēlke ē rot, ku kāk ye piη aabī lēk we. ¹⁴ Yeen aba leec, rin bī yen kēdiēn ba lueel lööm ku nyuth we. ¹⁵ Kāk Wä ēbēn aa kākkiē, ku ē yen acī γen ye lueel lön bī Wēi kāk ba yiēk ye lööm, ku jəl ke lēk we.

Rëec puəu ku miεt puəu

¹⁶ “Anəoot kaam thin nyəot, ku wek aacīi γa bī tīη, ku na ben a kaam thin nyəot ke we abī γen ben tīη.”

¹⁷ Go kəc kök kam kəcken ye buəoth lueel, “Kēnē wētde yic yenə? Aye lēk γo, kaam thin-nyəot ke week aacīi γa bī ben tīη, ku ben a kaam thin-nyəot ku wek aabī γa tīη? Ku lueel aya, ‘Ee rin ler γen tēnē Wä.’ ” ¹⁸ Gokē thiēc, “Kam thin-nyəot kēnē wētde yic ako? Kē wīc bī lueel akucku!”

¹⁹ Go Jethu ηic lön wīc kek ye bīk thiēc, ku lēk ke, “Aca lueel, ‘Kam thin nyəot ke week aacīi γa bī tīη, ku na ben a kaam dēt ke week aabī γa tīη.’ Ye wēt kēnē yen yakē thiēc kamkun? ²⁰ Wēt yic alēk we, wek aabī dhiau ku dhuəörkē apei, ku kəc pinynhom aabī puəth miεt, ku wek aabī puəth rëec, ku rëec piändun abī wel tēnē we bī ya miεt puəu. ²¹ Na thiök tik kek dhiēth ka rac puəu rin cī aköl reem ye γēēt, ku na cī meth jəl dhiēth ka arεem wēn acīi ben tak rin cī yen puəu miεt, rin cī yen meth dhiēth pinynhom. ²² Ku acīt kēnē tēnē we aya, wek aa rεc puəth emēn, ku wek aabā ben tīη,

ku wek aabi kueth miēt ē puōu, kuaat miēt puōu cīn raan bī ye bēn nyaai tēnē we.

²³ “Na la akōl kēnē bēn ke wek aaciī ya bī bēn thiēec kēdāŋ. Wēt yic alēk we, kēriēec ēbēn bāk thiēec ē rienkiē abī Wā yiēk we. ²⁴ Yet yakōl acīn kē cāk thiēec ē rienkiē, thiēckē ku abāk yōk, bī miēt puōu dīt tēnē we.

²⁵ “Kākkā aake ya lēk we waal, ku tē cīī yēn bī bēn jam waal aci thiōk, ku yēn abī ya jam tēnē we wēl la gēi rin Wā. ²⁶ Tē le akōl kēnē bēn, ke wek aabi Wā thiēec ē rienkiē. Ku acā bī lēk we lōn bī yēn ya rōök ē rienkun tēnē Wā, ²⁷ rin Wā anhiar we rin nhiēer wek ya, ku rin cī wek ye gam lōn yēn a ya bō tēnē Nhialic. ²⁸ Yēn abō tēnē Wā ba bēn pinynhom, ku pinynhom aba puōl ku dhuōk tēnē Wā.”

²⁹ Go kōcken ye buōth lēk ye, “Tiŋ, yīn ajam gēi ēmēn ke yī cīī ben jam waal. ³⁰ Acuk ŋic ēmēn lōn ŋic yīn kēriēec ēbēn, ku yīn aaciī tīt bī yī thiēec, rin wēt kēnē acuk ŋic lōn bīī yīn tēnē Nhialic.”

³¹ Go Jethu bēer tēnē ke, “Cāk jāl gam ēmēn? ³² Piēŋkē tēdāŋ abī bēn, ku aci thiōk ayic, tē bī wek wēer bī ŋek ala panden, ku wek aabā nyāāŋ piny yatōk. Ku acie yēn yatōk rot, rin Wā arēer kek ya. ³³ Wek aaca lēk kēnē rin bāk aa tōk kek yēn, bāk dōör yōk. Kōc pinynhom aabi we jōör, ku dēetkē wepuōth yēn aciī kārēc pinynhom lēu!”

17

Jethu arōök rin kōcken ye buōth

¹ Nawēn cī Jethu wēlkā thōl luēl, ke ŋēer yenyin nhial ku lueel, “Wā, akōl aci yēēt. Yiēk lēc Wēndu ku bī Wēndu yī yiēk lēc. ² Rin yīn aci bāāny yiēk ye

kɔc nɦiim  b n, b  p r ak lri ec ca g m ye yi k kɔc  b n. ³ Ku p r ak lri ec ak n, b  kɔc y   jic l n y n   Nɦialic la c k, ku  jick  Jethu raan c  l c ku d c w  r ca tu  c pinynhom. ⁴  en ac  l cdu nyu  th pinynhom, ku lu i ca yi k  a ba looi aca th  p. ⁵ W , g m  a l cdu y nhom t n  m n, l c w  r r  r kamkua  ok y , w th er ke piny k c cak.

⁶ “Y n aca nyu  th t n  kɔc ca yi k  a pinynhom. Keek aake ye kacku, ku   y n ac  ke g m  a, ku keek aac  w tdu gam. ⁷ Ke  m n a jick  l n k ri ec  b n ca yi k  a ab  t n  y . ⁸ W   en ac  w t ca l k  a l k ke, gok  gam, ku a jick  ayic yen l n b i  en t n  y , ku ac k gam l n c  y n  a tooc.

⁹ “ en   r ok   ri nken.  en acie r ok rin kɔc t  pinynhom, ee rin kɔc ca yi k  a rin ye kek kacku. ¹⁰ K kki   b n aa k kku, ku l cdi  aye nyu  th keyiic. ¹¹ Ku  m n  en ab  t n  y ,  en ac i ben a raan r  r pinynhom, ku keek aat  pinynhom. W  dh n, tit ke ri l   ri nku, rin w  r ca yi k  a, b k aa t k c m n  ok  o y . ¹² W  r r  r  en ke ke, aaca muk ri l   ri nku, keek aaca ke tiit ku ac n t n  i m  r kamken. Ar k ke raan w  r yen b  dhi l m  r   rot, rin b  w t c  g t ath r th er w l Nɦialic yenhom ti n. ¹³ Ku  m n  en ab  t n  y , ku k kk  aa ya lueel  a  oot pinynhom b  mi t pi ndi  r  r kepu th ke dit alanden. ¹⁴  en ac  w t l k ke, go kɔc pinynhom ke maan, rin c i kek ye kɔc pinynhom t n. C m n c i  en ye raan pinynhom t n aya. ¹⁵ Y n ac  b  thi ec ba ke nyaai pinynhom, ku y n aya thi ec ba ke tiit j nrac. ¹⁶ Keek aacie kɔc piiny t n c m n c i  en raan piny t n. ¹⁷ Mac ke w t yic, rin

wätdu ë yic. ¹⁸ Keek aca ke tuəoc pinyhom cïmën cï yïn ya tuəoc pinyhom. ¹⁹ Үен ë rot mac ë rienku, ku bik röt mac aya wët yic.

²⁰ “Үен acï röök rienken röt, Үен aröök aya rin kəc bi gam rin piöccden. ²¹ Үен aröök rin bi kek aa tök. Wä, cəl ke aaye tök Үoyiic cïmën tō yïn kek ya ku Үен kek yï. Cəl ke aaye tök rin bi kəc pinyhom ye gam lən cï yïn ya tooc. ²² Үен acï лec ca yiëk ya, aca yiëk ke bik aa tök cïmën ye Үok tök. ²³ Үен arëer keyiic cïmën rëer yïn Үayic bik aa tök ëbën, bi kəc pinyhom Үic lən cï yïn ya tooc, ku lən nhiëer yïn ke cïmën nhiëer yïn ya.

²⁴ “Wä, keek aaca yiëk ya, ku awiëc bik rëer tē rëer Үен thïn, bik лecdië tïҮ, лec ca yiëk ya, rin nhiëer yïn ya wäär kęc piny guə cak. ²⁵ Wä raan la cök, kəc pinyhom aa kuc yï, ku yïn anҮec, ku kəckä anҮickë lən cï yïn ya tooc. ²⁶ Yïn aca nyuəəth tēnē ke, ku aba Үot luəoi këya, rin bi nhiërdu tēnē ya tō keyiic, ku ba tōu keyiic aya.”

18

Jethu acï dəm

(Mt 26:47-56; Mk 14:43-50; Lk 22:47-53)

¹ Tëwën cï Jethu röök këya, ke jiël kek kəcken ye buəəth ku teem wär cəl Kidron. Ku gör ë tō thïn tēnē, go Jethu la thïn kek kəcken ye buəəth. ² Ku Judath raan gəony ye ë Үic tē cï yen la thïn, rin cï Jethu kaҮ röm thïn kek kəcken ye buəəth arak juëc. ³ Go Judath la gör yic kek akut apuruuk, ku kəc kək luaҮ Nhialic tiit, cï kəc kək Nhialic ku kəc akut Parathï tuəoc thïn. Keek aake muk təəҮ ku

mermer, ⁴ ku Jethu ë ñic keriëec ebën bi rot looi tēnē ye, go ke lor nñiim ku thiëec ke, “Yeña wiëckē?”

⁵ Gokē bēer, “Ee Jethu raan Nadharet.” Go lueel, “Ee yeñ.” Ku Judath, raan gōony ye ë tō thīn ke ke. ⁶ Kaam wēn lēk Jethu ye ke, “Ee yeñ,” Ke riñ ciēen kekōth ku wükkē piny. ⁷ Go Jethu ke bēn thiëec, “Yeña wiëckē?” Gokē lueel, “Ee Jethu raan Nadharet.”

⁸ Go Jethu lueel, “Aca lēk we wēnthēer lōn ye yen ya. Na wiëckē ya, ke we pāl kōckā bīk jāl.” ⁹ Yeen aci jam kēlā bi wēt cī kañ lueel elā rot tiēēñ tēdē, “Wā, na cōk a raan tōkalin kam kōc ca yiēk ya, ka kēc muōr.”

¹⁰ Ku Thaimon Pīter ë muk pal. Go miëet bei ku tōk alony raandit kāk Nhialic ku teem yīnyden cuēc wei. Ku alony ë cōl Malko. ¹¹ Go Jethu lēk Pīter, “Dhuōk paldu jōkgōde yic. Ye tak lōn cī yeñ areem cī Wā yiēk ya bi guum.”

Jethu aci yāth Anath nhom

¹² Go akut apuruuk kek bānyden ku kōc Itharel ke tit, Jethu dōm ku derkē, ¹³ ku kōñkē yāth tēnē Anath. Ku Anath ë ye wun tiñ Kaipa, raandit kāk Nhialic ye ruōñn kēnē. ¹⁴ Ee Kaipa yen ēci ye kañ lēk kōc Itharel lōn ñuēñ yen bi raan tōk thou rin kōc.

Pīter ajei Jethu

(Mt 26:69-70; Mk 14:66-68; Lk 22:55-57)

¹⁵ Go Thaimon Pīter kek raan dēt Jethu buōth, ku raan Jethu buōth kēnē ë ñic raandit kāk Nhialic guōp apei, go la kal pan raandit kāk Nhialic yic kek Jethu. ¹⁶ Ku dōñ Pīter ayeer kal thok. Go atuny wēn

ɲiɛc kek raandit kāk Nhialic dhuk ayeer, ku jɛɛm kek nyen tit kal thok, ku bii Piter alɔnthin. ¹⁷ Go nyen tit kal thok Piter thiëc, “Cii ye raan tök kam kɔc mony kënë buɔth?” Go Piter bëër, “Ye, yen acie raande.” ¹⁸ Ku wiir ë tɔ thin, go aloony ku kɔc tit many cool took, ku këckë many wën lööm bik yɔc. Go Piter la ku këc ke ke bi yɔc aya.

Jethu aluk raandit kāk Nhialic nom

(Mt 26:59-66; Mk 14:55-64; Lk 22:66-71)

¹⁹ Go raandit kāk Nhialic Jethu thiëc rin wët kɔcken ye buɔth, ku rin wët piöcde. ²⁰ Go Jethu bëër, “Yen ë cool jam akolaköl tënë raan ëbën kɔc nhim, ku piöcdië ëbën aya looi tən amat ku luan Nhialic tɛ ye kɔc Itharel guër thin. Ku yen acin kë ca kan lueel ke muɔny. ²¹ Ku yenö thiëc yin ya? Thiëc kɔc ci wëlkië pin. Thiëc ke wël ca lëk ke, rin aa ɲic wël ca lueel.”

²² Tëwën ci Jethu jam kälä, go raan tök kam kɔc tit ke kääc thin buök nyin ku lueel, “Cii riöc ba jam kälä tënë raandit kāk Nhialic?”

²³ Go Jethu bëër tënë ye, “Na ca kuöc jam, ke lëk kɔc tɛ ci yen kuöc jɛɛm thin. Ku na ye yic yen ca lueel, ke yenö meɲ yin ya?”

²⁴ Go Anath tuöc tënë Kaipa raandit kāk Nhialic, ke ɲot dɛr cin.

Piter aci Jethu bɛn jai

(Mt 26:71-75; Mk 14:69-72; Lk 22:58-62)

²⁵ Piter ë ɲot kääc tëwën ke yɔc mac. Go kɔc kök lueel tënë ye, “Cii ye raan tök kam abiöth ë mony kënë?” Go Piter jai ku lueel, “Ye, yen acie raande.”

²⁶ Go muɔny tök kam aloony raandit kāk Nhialic, ruäai kek raan wën ci Piter tök yic wei, jam ku

thiëc, “Këc yï tñj kek ye gör yic?” ²⁷ Go Pïter ben jai, ku kiu thon ajïth nyin yic.

Kac Itharel aaci Jethu gaany tënë Pilato

(Mt 27:1-2, 11-14; Mk 15:1-5; Lk 23:1-5)

²⁸ Gokë Jethu thël wei pan Kaipa ku yëthkë pan bënydït Roma, Pilato. Ku piny ë ye nhiäknhïäk dur yic. Go kac Itharel cïi la alonthin pan bënydït, ku bik röt tiitajuëc rin cï yai thiök, ku bik miëth Yan Ayum cïn yic luou cam. ²⁹ Go Pilato la ayeer tënë ke ku thiëc ke, “Ye awac ñö cäk yök ye mony kënë guöp?”

³⁰ Gokë bëër, “Na cïn awuoc cï looi ñuöt akëcku bëi tënë yï.”

³¹ Go Pilato lëk ke, “Week gup lömkë ku luoikë luk kë cït löj ciëñ pandun.”

Go kac Itharel bëër, “Akëc puöl tënë yo buk raan tëm thou.” ³² Kënë aci rot looi bi wët cï Jethu lueel rot tiëñ tède, wën lueel yen kuat thon bi yen thou.

³³ Go Pilato dhuk kal yic ku cöol Jethu ku thiëc, “Ye yïn Bënyaknhom kac Itharel?”

³⁴ Go Jethu bëër, “Wët kënë ye wëtdu aye kac kök kek cï ye lëk yï ë rienkië?”

³⁵ Go Pilato bëër, “Ye tak lon ye yen raan Itharel? Aa kacku guöp kek kacken dït käk Nhialic, kek aa bëi yï tënë ya. Yenö ca looi?”

³⁶ Go Jethu bëër, “Bäanydië acie bäany pinynhom. Na bäanydië ye kën pinynhom, ñuöt kackië aaci thör bi yen cïi tëu kac Itharel cin. Acie këya, bäanydië acie kën pinynhom tën.”

³⁷ Go Pilato ben thiëc, “Yïin, ye bënyaknhom?” Go Jethu bëër, “Aye lueel lon ye yen bënyaknhom.

Үен асi дhiëeth ku Үен асi бөн pinynhom rin wët tōҗ кәнә, ба jam wët yic. Ku kuat raan сi yic җic ӗ wëtдиӗ piҗ.”

³⁸ Go Pilato thiëc, “Ku yic ye кән җө?” Ku ben dhuk аҮеер тәнә кәс Itharel ku лӗк ke, “Acin awuöc ca лӗu ба yök yeguöp bi ye luök wei. ³⁹ Ku yeen ӗ wët piändun ба raan tōҗ сi mac lony rin Yan Ayum сin yic luöu. Wiëckë ба Bënyҗaknhom кәс Itharel luöny we?”

⁴⁰ Gokë dhuök ye ke loi киεεu, “Acie кәya! Acie yen wiöku. Barabath yen awiöku.” Ku Barabath ӗ ye сuär кәс rum.

19

Jethu асi tēm thou

(Mt 27:15-31; Mk 15:6-20; Lk 23:13-25)

¹ Go Pilato Jethu dәм ku сәл athat. ² Ku җәл apuruuk кәр thii tim la куәth riic yiic ku җәк kek yenhom, ku тӗүкә alanh mathiәҗ yeköu, ³ ku bikkë тәнә ye ku luelкә, “Madho, Bënyҗaknhom, Bëny кәс Itharel,” ku маҗкә nyin.

⁴ Go Pilato бөн dhuk аҮеер ku лӗк кәс wән сi кenhim kut, “Yeen aba thәl аҮеер тәнә we тәнә, ku бәк тiҗ лән сin yen тә bi Үен awuöc yök yeguöp ба luök wei.” ⁵ Këya, go Jethu бөн аҮеер ke ceҗ җакҗак сi looi куәth ku alanh mathiәҗ yeköu. Ku luel Pilato тәнә ke, “Yen kin, yen raan!”

⁶ Nawән тiҗкә, ke кәс кәк Nhialic ku кәс tit kiu ku luelкә, “Piäät tim сi riü köu.” Go Pilato лӗк ke, “Damкә kek we бәк piäät tim сi riü köu, Үен akëc awuöc yök yeguöp.”

7 Gokë wët dhuk, “Yok aa la lõη ciεηda ye lueel lõn dhil ye nõk, rin acī lueel lõn ye yen Wën Nhialic.”

8 Nawën piη Pilato wët kënë, ke riöc apɛi. 9 Ku dhuk kal yic ku thiëc Jethu, “Yiin bäär tēnen?” Go Jethu biɛt ku cii bēer thok acin. 10 Go Pilato lëk ye, “Cii wic ba jam kek ya? Tak yinhom lõn nadë ke yēn ala riel ba yi puöl, ku yēn ala riel aya ba yi cöl apiëet tim cī riüu köu.”

11 Go Jethu bēer, “Yin ala riel tēnë ya rin cī Nhialic ye yiëk yi, ku ë yen ale raan cä tääu yicin guöp awuöc rac apɛi.”

12 Nawën piη Pilato wëlkä, ke wic apɛi bi dhël yök bi yen Jethu puöl. Go kəc Itharel kiu tēnë ye ku luelkë, “Të lony yin ye ka ye nyooth lõn cii yin mäath kek Bēnyñaknhom. Kwat raan rot looi bi ya bēnyñaknhom, ee raan ater Bēnydan ñaknhom.”

13 Nawën piη Pilato ë wëlkä, ke thel Jethu ayeer ku nyuuc thöny luk tö laar cöl, “Piny cī guuir kuör,” Ku ë cöl Gabata thoη kəc Itharel. 14 Ku aköl kënë yen aköl guuir kəc röt rin Yan Ayum cīn yic luäu. Nawën təcit aköl ciɛl yic, ke lëk Pilato kəc Itharel, “Bēnydun ñaknhom akīn!”

15 Gokë kiu tēnë ye, “Näk! Näk! Piäät tim cī riüu köu!” Go Pilato ke thiëc, “Wiëckë ba Bēnydun ñaknhom piäät tim cī riüu köu?”

Go kəc käk Nhialic bēer, “Bänyda ë tök, ee bēnyñaknhom Roma!”

16 Go Pilato ke yiëk Jethu bik la piäät tim cī riüu köu.

*Jethu acī piäät tim cī riüu köu
(Mt 27:32-44; Mk 15:21-32; Lk 23:26-43)*

Gokë Jethu dóm. ¹⁷ Ku ler ayeer ke ket timden cï riïu, ke jiël geeu bi la tē cəl Golgotha. (Ku wētde yic, gɔn la guen-ɲeɲ cīt apen nom raan.) ¹⁸ Ku jolkë piäät tim cï riïu kəu. Ku piëtkë kəc karou aya tiim cï riïu kəöth, raan tók ləɲ cuēc ku raan dēt ləɲ cam. Ku Jethu ciel kamken. ¹⁹ Go Pilato awuöc göt bi tääu tim cï riïu nom. Ku kën cï göt akïn, “JETHU RAAN NADHARET, BĒNYŅAKNHOM ITHAREL.” ²⁰ Ku kəc juēc aake cï kënë kueen, rin tən cï Jethu piäät tim cï riïu kəu thïn, acii mec ke γεu. Ku wēt ecï göt thoɲ kəc Itharel ku thoɲ kəc Roma ku thoɲ Girik. ²¹ Go kəcdit kək Nhialic Itharel lək Pilato, “Duk ye göt, ‘Bēnyaknom kəc Itharel,’ aɲuëen ba göt, ‘Acı mony kënë lueel, ɣen ë bēnyaknom kəc Itharel.’ ”

²² Go Pilato bēer, “Kë ca göt arëer ke ca göt.”

²³ Nawën cï apuruuk Jethu piäät tim cï riïu kəu, ke löm aläthke ku tekkë keyiic ɲuan, aban tók tənë apuruök tók. Ku lömkë alanh kəu aya cï kəoc këdiët tók, jəok yeyeth yet piny. ²⁴ Ku luelkë kamken, “Dukku tem kəu, cuetku gək buk tiɲ bi lööny tənë ɲa.” Kënë acı rot looi bi wēt cï göt athör thëer wël Nhialic yic rot tiëɲ tēde,

“Keek aaci aläthkië tek kamken, ku cuetkë gək rin alanhdiën kəu.”

Kënë yen acı apuruuk looi ayic.

²⁵ Ku tēthiök kek tim cï riïu Jethu, diäär aake kääc thïn, man ku nyankën ë man, Maria tiɲ Klopeth ku Maria Magdalena. ²⁶ Nawën tiɲ Jethu man ku raan ye buöth nhiëer ke kääc aya ë tēen, ke lək man, “Tik manhdu akïn.”

²⁷ Ku ben lëk raan ye buoath wën, “Moor akïn.” Ku yaköl guöp ke wïc raan ye buoath awën piny paande.

Jethu aci thou ayic

²⁸ Nawën ñic Jethu lön cï keriëec ëbën thääp, ke lueel bï wët cï gõt athör theer wël Nhialic yic rot tiεεη, “Υεν anëk rou.”

²⁹ Ku töny cï thiän muön wac ë tö thïn, gokë alath luöt mōu yic, ku tēükë wai thok, ku γοοkkë yethok.

³⁰ Nawën cï Jethu muön wac jooc ke lueel, “Wët aci thääp.” Ku gut yenhom piny ku thou.

Jethu aci gut puöu

³¹ Go kəc Itharel Pilato thiëec bï ke puöl bik kəc cï piäät tiim cï rïü köth dhoη kuöl, ku nyεεikë guäpken tiim cï rïü köth. Ku ë loikë këlä rin ye yen aköl niën Dhiëc, ku acik ye wïc bï guäpken rëer tiim cï rïü köth aköl niën Dätem, rin yen aköl yandit apεi. ³² Go apuruuk la ku dhoηkë kuöl raan tök ku kuöl raan dët, ë kəc cï piäät tiim cï rïü köth kek Jethu. ³³ Nawën bikkë tēnë Jethu, ke tïηkë lön cï yen thou ku cïk ben dhoη kuöl. ³⁴ Go apuruöη tök Jethu gut puöu təη, go riεm ku pïu kuër nyin yic. ³⁵ Ku raan cï kënë tïη aci lueel rin bï wek ye gam aya. Wët cï lueel ë yic, ku yeen aηic lön ye yen wët yic yen lueel. ³⁶ Kënë aci rot looi bï wët cï gõt athör theer wël Nhialic yic rot tiεεη, “Acïn yuömden bï dhoη.” ³⁷ Ku ben lueel tädët athör yic ëlä, “Ku aabi daai raan yen cïk gut.”

Jethu aci thiäk

³⁸ Nawën ë kënë cök ciëen, ke Jothep raan gen Arimatheo bõ tënë Pilato ku thiëc bi guöp Jethu nyaai. (Jothep ë ye raan Jethu buoath ci gam, ku aye moony rin riöc yen bány Itharel.) Go Pilato lëk ye lön ci guöp puöl tënë ye. Go Jothep la ku le nyaai. ³⁹ Go Nikodemo, raan wäär ci kañ la tënë Jethu waköu, rot mät Jothep ku ë muk miök njir col mira ci liäap wäl dët col aloe. ⁴⁰ Go röör wën karou guöp Jethu lööm ku derkë köu alath ke ci wäl njir tääu thïn, rin kënë yen ë tẽ ye kac Itharel guiër guöp raan ci thou bi jäl thiök. ⁴¹ Ku tẽwën ci Jethu nõk thïn gör ë tõ thïn, ku rañ yam ë tõ gör yic, ku ë cïn raan ci kañ thiök thïn. ⁴² Ku rin bi yen aköl yan kac Itharel nhiäk, ku rin thiök rañ aya, gokë guöp Jethu tööu thïn.

20

Rañ aci yic lääu

¹ Riël yic aköl Nhialic ke piny not la durdur, ke Maria Magdalena la rañ nom, go alël tñj ke ci nyaai rañ thok. ² Go rin tënë Thaimon Pïter, ku tënë raan dët Jethu buoath nhiëer Jethu, ku lëk ke, “Kac aaci Bëny nyaai rañ yic ku akucku tẽ ci kek ye tääu thïn.”

³ Go Pïter ku raan Jethu buoath dët wën lööny dhöl, ku lekkë rañ nom. ⁴ Ku keek aake la ke kat kedhie, go raan Jethu buoath dët wën kat apëi tënë Pïter, ku ye yen kañ yet rañ nom. ⁵ Go guñ ku tñj alanh wäär ci Jethu der, ku akëc la alonhthïn. ⁶ Go Thaimon Pïter guo bën ku ler rañ yic. Go alëth tñj ke rëer piiny, ⁷ ku alanh ci Jethu kum nom ëcïi rëer kek alëth kök, ëcï mat yic tẽde rot. ⁸ Go raan Jethu

buoath dēt wën cī kan ʔet ran ʔet ran nhom jäl la alonthin, ku gem. ⁹ (Ku keek aake ʔot ke kēc wēt athör theer wël Nhialic deet yic, athör ye lueel lön bi yen rot dhiel ʔot thou yic.) ¹⁰ Go kəc ye buoath jal dhuk bei.

Jethu aci rot nyuöth Maria Magdalena

¹¹ Kaam wën Maria ë kääc ayeer tēthiäak kek ran ke dhiau. Ku tēwën ʔot dhiεu yen ke guöŋ ku luit ran yic, ¹² Ku tiŋ atuuc nhial cī ruk alēth ʔer karou, ke rēer tēwäär cī guöp Jethu tōsu thin, tōk tē la yenhom ku dēt tē la yecök. ¹³ Gokē thiēc, “Tik, ye rin ʔo dhiεu yin?” Go lueel, “Keek aaci Bānydiē nyaai, ku akuöc tē cī kek ye täau thin.”

¹⁴ Kaam wën lueel yen kēnē, ku ʔal wel yenyin ke tiŋ Jethu ke kääc yelööm, ku akēc ʔic lön ë yen Jethu. ¹⁵ Go Jethu thiēc, “Tik, ye rin ʔo dhiεu yin? Yeŋa wic?” Go tak lön ë yen raan lui dom yic, ku lək ye, “Bēny, na ye yin cī ye nyaai, ke lək ʔa tē cī yin ye tōsu thin, ku ʔen abi la ba la lööm.”

¹⁶ Go Jethu lək ye, “Maria.” Go yenhom wël ye ku lueel thon kəc Itharel, “Rabuni,” ku wētde yic, “Raan piöoc.”

¹⁷ Go Jethu lək ye, “Duk ʔa ʔot rin ʔen ʔot ʔa kēc ʔet nhial tēnē Wä. Ku yiin lör tēnē wämāthkiē ku lək ke, ‘ʔen adhuk ciēen tēnē ye, yen ë Wä, ku ye Wuurdun, Nhialicdiē ku ye Nhialicdun.’ ”

¹⁸ Go Maria Magdalena jäl ku le lək kəc ye buoath lön cī yen Bēny tiŋ, ku lək ke wël cī Jethu lək ye.

Jethu aci rot nyuöth kacken ye buoath

¹⁹ Naʔon thēei ya aköl Nhialic wën, ke kəc ye buoath aake cī röt mat ʔön cī riit thok, rin riöoc kek bāny Itharel. Go Jethu bēn ku kēc kamken ku lueel, “Bi döör rēer kek we.” ²⁰ Wën cī yen jam kēlä,

ke nyuth ke yecin ku yelöm. Go kəc ye buoath puöth miət apɛi wən tiŋ kek Bëny. ²¹ Ku ben Jethu lək ke, “Bī dōör rëer kek we, cīmən cī Wä ya tooc, ke wek aa ba tooc aya.” ²² Wən cī yen jam kälä, ke jəl wëei kenhüm ku lueel, “Lömke Wëi Nhialic. ²³ Na pälkë adumuööm kəc piny, ka pël piny, na cäk ke pël piny, ka cii pël piny.”

Jethu ku Thomath

²⁴ Ku Thomath, cəl Acueek, raan tök kam kəc kathiäär ku rou ye buoath, ee liu thin wən bii Jethu. ²⁵ Go abiöth kök lək ye, “Bänyda acuk tiŋ.”

Go Thomath lək ke, “Na cie tëtöök wäär cī ye piäät kek tiŋ yecin, ku tääu yacin ë tëtöökkä yiic, ku tääu yacin yeyou aya, ka cä kəŋ gam.”

²⁶ Nawën nin kabët cök, ka abiöth aake cī röt ben mat yöt ku Thomath ë rëer thin ke ke, ku yöt ëcī riit thok. Go Jethu ben kööc kamken ku lueel, “Bī dōör rëer kek we.” ²⁷ Ku jəl lək Thomath, “Tääu yicin tēn, ku tiŋ cienkië ku jət yikök ba yicin tääu yəyau. Päl kënë yin kəŋ dhöl yiic, ku gam!” ²⁸ Go Thomath bëer, “Bänydië ku Nhialicdië.”

²⁹ Go Jethu lək ye, “Ca gam rin cī yin ya tiŋ? Ye këpuoath bī yiëndë tēnë kəc bī gam ke këc ya tiŋ!”

Wët wïc athör kënë bī nyuöth kəc

³⁰ Jethu acī kädit jəŋ gäi looi kacken ye buoath nhüm, ku keek aa këc göt athör kënë yic.

³¹ Ku kakkä aaci göt rin bäk gam lən ye Jethu Wën Nhialic cī ləc, ku bäk pür yök ë rienke tē cī wek gam.

21

Jethu aci rot nyuõth kãc ye buõõth kadhorou

¹ Nawën ë kãkkã cõk ciëen ke Jethu ben rot nyuõth kãcken ye buõõth wãr Tiberia yõu. Ku tẽ ci luõi ye akìn. ² Thaimon Pïter kek Thomath (cõl Acueek), ku Nathaniel (raan Kana pan Galilia), ku wëët Dhubedi, ku kãc kãk karou Jethu buõõth, aake rëër tëtõk ëbën. ³ Go Thaimon Pïter lëk kãc wën, “Υεν ala mei.”

Gokë lëk ye, “Υok aabï cath kek yï.” Gokë la ku lek riãi yic, ku acïn kë cïk dõm ë wëër kënë yic ëbën.

⁴ Tëwën bïi akõl nyin, ke Jethu ë kãac wãr yõu, ku akëc kãcken ye buõõth ñic lõn ë yen Jethu. ⁵ Go lëk ke, “Riënythii, cïn kë cãk dõm?” Goke bëër, “Acïn kädãñ.”

⁶ Go lëk ke, “Cuatkë buõi lõñ cuëny riãi, ku kãñ aa bãk dõm thïn.” Gokë buõi cuat ku göök ke bïk miit rin juëc rec apëi.

⁷ Go raan Jethu buõõth nhiëer Jethu lëk Pïter, “Kën ë Bëny.” Nawën piñ Thaimon Pïter lõn ye yen Bëny, ke ruk alanhde yekõu (rin ci yen alãthke dãk bei ëbën) ku thuëet wïir. ⁸ Go abiõth kãk lõk bën ke cath riãi, ke thel buõi ke ci thiãñ rec. Ku keek aake cïi mec apëi kek agõr, aake cit akããth bian tõk. ⁹ Nawën kεεckë piny ke tïñ many ë miim ke dëp ku rec ke ci tããu mεεc kek ayup. ¹⁰ Go Jethu lëk ke, “Bëëikë rec abëk rec awën cãk dõm.”

¹¹ Go Thaimon Pïter la riãi yic ku miit buõi wãr thok ke ci thiãñ rec dït, ku rec ëbën aa buõõt ku thiãrdhiëc ku diãk. Tëwën cõk rec juëc këlã, buõi akëc yic rεεt. ¹² Go Jethu lëk ke, “Bãk, miëthkë.” Ku

acın raan tók kam kəc ye buəth cı ye cak thiëc, “Ye yın ɲa?” Rin ɲic kek ye lən ye yen Bëny. ¹³ Go Jethu rot cuət ku lööm ayup ku yik ke ku ben looi këya kek rec.

¹⁴ Këlä, Jethu acı rot nyuəth kəc ye buəth kën yen yic diäk, tēwën cı yen rot jət kam kəc cı thou.

Jethu ku Pıter

¹⁵ Wën cı kek mıth ke lək Jethu Pıter, “Thaimon wën Joon, ɲiar ɲa apɛi tən tē ɲhiɛɛr kəkä ɲa?”

Go bëɛr, “Ee këya Bëny, aɲic lən ɲhiɛɛr ɲen yı.”

Go Jethu lək ye, “Biöök amälkië apath.” ¹⁶ Ku ben Jethu lək ye, “Thaimon, wën Joon ɲiar ɲa apɛi?”

Go bëɛr, “Ee këya Bëny aɲic lən ɲhiɛɛr ɲen yı.”

Go Jethu lək ye, “Biöök amälkië apath.” ¹⁷ Ku ben Jethu thiëc arak dët ye kek diäk, “Thaimon, wën Joon ɲiar ɲa?”

Go Pıter puşu dak rin cı Jethu ye thiëc arak dët ye kek diäk, “ɲiar ɲa?” Ku lək ye, “Bëny, yın aɲic këriëc ëbën, ku yın aɲic lən ɲhiɛɛr ɲen yı.”

Go Jethu lək ye, “Biöök amälkië apath, ¹⁸ Wët yic alək yı, wäär ɲot ye yın riënythii ke yın ye rot guiir ku lər tē wic piändu, ku tē bı yın dhiəp ke yın abı yicin ɲaak tuen, ku raan dët abı der ku thel yı tē cıi wic ba la thın.”

¹⁹ Käkä aacı Jethu lueel bı nyuəth Pıter tē bı yen thou thın, ku bı kəc cəl aaye Nhialic leec thın. Ku jəl Jethu lək ye, “Buəth ɲa.”

Jethu ku raan dët ye buəth

²⁰ Go Pıter yenhom wel ku tıɲ raan dët ye buəth ɲhiɛɛr Jethu ke buəth ke, raan wäär thiäak kek Jethu wäär mıth kek, cı Jethu bën thiëc ëlä, “Bëny,

yeŋa bi yi la gaany?” ²¹ Wën tiŋ Piter ye, ke lëk Jethu, “Bëny, na raan dëtë, bi yiëndë?”

²² Go Jethu bëër, tënë ye, “Na wiëc bi pïr yet aköl bi yeŋ bën, ke yeŋö tënë yi? Yïin ëmën buoŋh ya.”

²³ Go wët thiëi piny kam kɔc buoŋh Jethu lɔn raan Jethu buoŋh kënë aciï bi thou. Ku akëc Jethu lueel lɔn ciï yen bi thou. Acï lueel, “Na wiëc bi pïr yet aköl bi yeŋ bën ke yeŋö tënë yi?”

²⁴ Raan kënë yen ë raan Jethu buoŋh jam käk ci tiŋ, ku yen ë gët ke aya, ku aŋic lɔn wët ci lueel ë wët yic.

²⁵ Ëmën käjuëc kɔk aatö thïn, käk ci Jethu looi. Na ke ci gät piny ëbën, tök ku tök, ke yeŋ aya thöŋ lɔn piny ëbën aciï lëu bi athör gät jət.

Lëk yam
New Testament in Dinka, Southwestern (SU:dik:Dinka,
Southwestern)

copyright © 2006 Wycliffe Bible Translators, Inc.

Language: Dinka, Southwestern

Translation by: Wycliffe Bible Translators, Inc.

Dinka, Southwestern

dik

Sudan

Copyright Information

© 2006, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Dinka, Southwestern

© 2006, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-22

PDF generated using Haiola and XeLaTeX on 11 Nov 2022 from source files dated 29 Jan 2022

d94b9d26-33ff-5c4e-819f-5bfe86ac9e55